

SEE CAO

**Rregullat për Alokimin Eksplicit Ditor të
Kapacitetit në kufijtë e Zonave Ofertuese të
shërbyer nga Zyra e Ankandëve të Koordinuara
të Evropës Juglindore (SEE CAO)**

Versioni 2.0



**Podgoricë, Mali i Zi
Maj, 2022**

Përmbajtja

Përmbajtja

Përmbajtja	2
KAPITULLI 1	5
<i>Neni 1 Lënda dhe fushëveprimi.....</i>	<i>5</i>
<i>Neni 2 Përkufizimet dhe interpretimi</i>	<i>5</i>
<i>Neni 3 Platforma e alokimit</i>	<i>8</i>
<i>Neni 4 Data efektive dhe zbatimi</i>	<i>8</i>
KAPITULLI 2	9
<i>Neni 5 Dispozita e Përgjithshme</i>	<i>9</i>
<i>Neni 6 Lidhja e Marrëveshjes së Pjesëmarrjes</i>	<i>9</i>
<i>Neni 7 Forma dhe përmbajtja e Marrëveshjes së Pjesëmarrjes</i>	<i>10</i>
<i>Neni 8 Dorëzimi i informacionit</i>	<i>10</i>
<i>Neni 9 Garancitë.....</i>	<i>11</i>
<i>Neni 10 Llogaria e Dedikuar e Biznesit.....</i>	<i>12</i>
<i>Neni 11 Pranimi i Rregullave të Sistemit të Informacionit</i>	<i>12</i>
<i>Neni 12 Kostot e lidhura me Marrëveshjen e Pjesëmarrjes</i>	<i>12</i>
<i>Neni 13 Refuzimi i aplikimit.....</i>	<i>12</i>
<i>Neni 14 Qasja në mjetin e ankandit.....</i>	<i>12</i>
<i>Neni 15 Lidhja e kushteve shtesë financiare.....</i>	<i>13</i>
<i>Neni 16 Kërkesat rregullatore dhe ligjore</i>	<i>13</i>
KAPITULLI 3	14
<i>Neni 17 Dispozitat e përgjithshme</i>	<i>14</i>
<i>Neni 18 Forma e depozitës në para të gatshme</i>	<i>14</i>
<i>Neni 19 Forma e Garancisë Bankare</i>	<i>15</i>
<i>Neni 20 Vlefshmëria dhe ripërtëritja e Garancisë Bankare.....</i>	<i>16</i>
<i>Neni 21 Limiti i kreditit</i>	<i>16</i>
<i>Neni 22 Modifikimet e kolateraleve.....</i>	<i>17</i>
<i>Neni 23 Incidenti i kolateraleve</i>	<i>17</i>
<i>Neni 24 Thirrja e kolateraleve</i>	<i>17</i>
KAPITULLI 4	19
<i>Neni 25 Dispozitat e përgjithshme për ankandet</i>	<i>19</i>
<i>Neni 26 Afati i alokimit të kapacitetit dhe forma e produktit.....</i>	<i>19</i>
<i>Neni 27 Specifikimi i ankandit.....</i>	<i>19</i>
<i>Neni 28 Dorëzimi i ofertave</i>	<i>20</i>
<i>Neni 29 Regjistrimi i ofertës</i>	<i>20</i>

Neni 30 <i>Oferta e paracaktuar</i>	21
Neni 31 <i>Oferta e paracaktuar për ankandin rezervë/alternativ</i>	21
Neni 32 <i>Verifikimi i limitit të kreditit</i>	21
Neni 33 <i>Përcaktimi i rezultateve të ankandit</i>	22
Neni 34 <i>Njoftimi i rezultateve të Ankandit</i>	24
KAPITULLI 5	26
Neni 35 <i>Parimet e përgjithshme</i>	26
Neni 36 <i>Nominimi i të Drejtave fizike të transmisionit</i>	26
Neni 37 <i>Dokumenti i të drejtave</i>	26
Neni 38 <i>Rezervimi i të Drejtave fizike të transmisionit për shërbimet e balancimit</i>	27
KAPITULLI 6	28
Neni 39 <i>Dispozitat e përgjithshme</i>	28
Neni 40 <i>Procedura alternative për shkëmbimin e të dhënave</i>	28
Neni 41 <i>Procedura alternative e ankandit</i>	29
Neni 42 <i>Ankandi alternativ</i>	30
Neni 43 <i>Anulimi i ankandit</i>	30
KAPITULLI 7	32
Neni 44 <i>Ngjarjet shkaktare dhe pasojat e shkurtimeve në të Drejtat ditore të transmisionit</i>	32
Neni 45 <i>Procesi dhe njoftimi i shkurtimit</i>	32
KAPITULLI 8	33
Neni 46 <i>Parimet e përgjithshme</i>	33
Neni 47 <i>Llogaritja e shumave të detyruara</i>	33
Neni 48 <i>Rritja e shumës për të fituar shumën bruto për qëllime tatimi</i>	33
Neni 49 <i>Kushtet e faturimit dhe pagesës</i>	34
Neni 50 <i>Mosmarrëveshjet rreth pagesave</i>	35
Neni 51 <i>Pagesa e vonuar dhe incidenti i pagesës</i>	36
KAPITULLI 9	37
Neni 52 <i>Kohëzgjatja dhe ndryshimi i Rregullave të Alokimit</i>	37
Neni 53 <i>Përgjegjësia</i>	38
Neni 54 <i>Zgjidhja e mosmarrëveshjeve</i>	38
Neni 55 <i>Pezullimi i Marrëveshjes së Pjesëmarrjes</i>	40
Neni 56 <i>Ndërprerja e Marrëveshjes së Pjesëmarrjes</i>	41
Neni 57 <i>Forca Madhore</i>	42

Neni 58 <i>Njoftimet</i>	43
Neni 59 <i>Konfidencialiteti</i>	44
Neni 60 <i>Caktimi dhe nënkontraktimi</i>	45
Neni 61 <i>Ligji rregullues</i>	45
Neni 62 <i>Gjuha</i>	45
Neni 63 <i>Prona intelektuale</i>	45
Neni 64 <i>Marrëdhënia e palëve</i>	45
Neni 65 <i>Asnjë e drejtë e palës së tretë</i>	46
Neni 66 <i>Heqja dorë</i>	46
Neni 67 <i>Marrëveshje e plotë</i>	46
Neni 68 <i>Mjetet juridike ekskluzive</i>	47
Neni 69 <i>Vlefshmëria e pjeshme</i>	47
Shtojca 1	48

KAPITULLI 1

Dispozitat e përgjithshme

Neni 1

Lënda dhe fushëveprimi

1. Këto Rregulla të Alokimit përmbajnë termat dhe kushtet për Alokimin eksplicit të të Drejtave ditore të transmisionit në kufijtë e Zonave ofertuese të specifikuar në Shtojcën 1, duke nënkuptuar që Pjesëmarrësi i Regjistruar do të dakordohet me këto rregulla me nënshkrimin e Marrëveshjes së Pjesëmarrjes. Në veçanti, Rregullat e Alokimit përcaktojnë të drejtat dhe detyrimet e Pjesëmarrësve të Regjistruar si dhe kërkesat për pjesëmarrje në Ankande, ato përshkruajnë procesin e Ankandit, përfshirë përcaktimin e Çmimit Margjinal si rezultat i Ankandit dhe proceset për shkurtimin e të drejtave ditore të transmisionit dhe faturimin / pagesën.
2. Në rast se Operatorët e Sistemit të Transmisionit fusin çiftimin e tregut si metodë e Alokimit të Kapacitetit në një kufi të Zonës Ofertuese të listuar në Shtojcën 1, kufiri në fjalë i Zonës Ofertuese përjashtohet nga Ankandet e rregulluara nga këto Rregulla të Alokimit në parim që nga koha e zbatimit të çiftimit të tregut. Ky ndryshim kërkon vetëm vendimin e Operatorëve përkatës të Sistemit të Transmisionit dhe i nënshtrohet miratimit të autoriteteve përkatëse rregullatore përpara se të bëhet i vlefshëm.
3. Ankandet i referohen vetëm Kapacitetit Ndër-Zonal dhe Pjesëmarrësit e Regjistruar nuk mund të thirren në asnjë të drejtë tjetër në lidhje me të Drejtat ditore të transmisionit të alokuar atyre, përveç të drejtave në përputhje me dispozitat e këtyre Rregullave të Alokimit.
4. Është pranuar që operacioni i Platformës së Alokimit mbulon zonën ku operojnë OST të Bashkimit Evropian, operatorët e sistemit të transmisionit nga palët kontraktuese të Traktatit të Komunitetit të Energjisë si dhe operatorët e sistemit të transmisionit nga vendet e tjera. Referencat ndaj (a) OST ose Operatorit të Sistemit të Transmisionit përfshijnë pra referencat ndaj OST të BE-së, operatorëve të sistemit të transmisionit nga palët kontraktuese të Traktatit të Komunitetit të Energjisë, si dhe operatorëve të sistemit të transmisionit nga vende të tilla të tjera, dhe (b) Autoritetet Rregullatore Kombëtare ose ARK-të përfshijnë referenca ndaj ARK-të e BE-së dhe autoritetin(et) rregullatore përkatëse kombëtare në palët kontraktuese të Traktatit të Komunitetit të Energjisë dhe vendeve të tjera përkatëse.

Neni 2

Përkufizimet dhe interpretimi

1. Termat e shkruar me shkronja të mëdha të përdorura në këto Rregulla të Alokimit kanë kuptimin e dhënë në nenin 2 të Rregullores (BE) 2019/943, nenin 2 të Rregullores (KE) 714/2009, nenin 2 të Rregullores (KE) 2013/543, nenin 2 të Rregullores (BE) 2015/1222, nenin 2 të Direktivës (BE) 2019/944, nenin 2 të direktivës 2009/72/KE dhe në Rregulloren (BE) 2016/1719.
2. Për më tepër, zbatohen përkufizimet e mëposhtme:

Afiliat (filial) do të thotë, në lidhje me ndonjë person, çdo person tjetër që kontrollon drejtpërdrejt ose indirekt, kontrollohet nga ose është nën kontroll të drejtpërdrejtë ose indirekt të përbashkët me atë person siç përcaktohet kontrolli në Rregulloren e BE (KE) nr. 139/2004 të 20 janarit 2004 për kontrollin e përqendrimeve ndërmjet ndërmarrjeve ose, sipas rastit, legjislacionin e ngjashëm kombëtar;

Platforma e alokimit nënkupton entitetin e emëruar dhe autorizuar nga Operatori (ët) përgjegjës i Sistemit të Transmisionit për të vepruar në emër të tyre dhe në emër të vet duke qenë platforma e vetme e alokimit ose platforma (at) rajonale për atribimin e Kapacitetit Ditor Ndër-Zonal përmes Ankandëve siç përcaktohet në Marrëveshjen e Pjesëmarrjes;

Rregullat e alokimit nënkupton rregullat për Alokimin eksplicit të Kapacitetit Ditor në kufijtë e Zonës Ofertuese të shërbyer nga SEE CAO;

Mjeti i ankandit nënkupton sistemin e teknologjisë së informacionit të përdorur nga Platforma e Alokimit për të kryer Ankandë dhe për të lehtësuar procedurat e tjera të përshkuara në këto Rregulla të Alokimit;

Specifikimi i Ankandit nënkupton një listë të karakteristikave specifike të një Ankandi të veçantë, duke përfshirë natyrën e produkteve të ofruara dhe datat përkatëse;

Garancia bankare nënkupton një letër kredie *standby* të pakthyeshme dhe të pakushtëzuar ose letrën e garancisë të emetuar nga banka;

Ofertë do të thotë Sasia e Ofertës dhe Çmimi i Ofertës të ofruar nga Pjesëmarrësi i Regjistruar që merr pjesë në një Ankand;

Çmimi i Ofertës nënkupton çmimin që një Pjesëmarrës i Regjistruar është i gatshëm të paguajë për një (1) MW dhe orë të të Drejtave ditore të transmisionit;

Sasia e ofertës nënkupton sasinë e të Drejtave ditore të transmisionit në MW të kërkuar nga Pjesëmarrësi i Regjistruar;

Periudha Ofertuese nënkupton periudhën kohore brenda së cilës Pjesëmarrësit e Regjistruar që dëshirojnë të marrin pjesë në një Ankand mund të paraqesin Ofertat e tyre;

Llogari biznesi do të thotë një llogari depozite e dedikuar e hapur nga Platforma e Alokimit me qëllim të sigurimit të kolateraleve në formën e depozitave në para nga Pjesëmarrësit e Regjistruar, të cilat mund të përdoren për pagesa nga Pjesëmarrësi i Regjistruar ;

Identifikimi i Marrëveshjes së Kapacitetit (CAI) nënkupton kodin unik të identifikimit të caktuar për secilën të Drejtë Fizike të Transmisionit nga Mjeti i Ankandit gjatë Ankandit. Kodi i identifikimit përdoret gjithashtu kur përdorimi i të Drejtës Fizike së Transmisionit i caktohet Operatorëve të Sistemit të Transmisionit;

Limiti i kreditit do të thotë shuma e kolateraleve që mund të përdoret për të mbuluar çdo paraqitje të Ofertës në Ankandet pasuese dhe nuk përdoret për detyrimet e pagesave të papaguara;

Alokimi i Kapacitetit Ditor do të thotë atribimi i Kapacitetit Ditor Ndër-Zonal përmes një Ankandi;

E Drejta ditore e transmisionit do të thotë për qëllimet e këtyre Rregullave të Alokimit një e Drejtë Fizike e Transmisionit e fituar në Alokimin e Kapacitetit Ditor;

Kodi EIC nënkupton Skemën e Kodimit të Identifikimit të Energjisë ENTSO-E që identifikon palët në tregtinë ndërkufitare;

Ankandi Alternativ/rezervë (eng.: Fallback) nënkupton procesin me të cilin Platforma e Alokimit i atribuon kapacitetet një Pjesëmarrësi të Regjistruar në rast se aktivizohet moduli

alternativ (*fallback*);

Forca Madhore (Force Majeure) nënkupton çdo ngjarje ose situatë të paparashikueshme ose të pazakontë përtej kontrollit të arsyeshëm të një Pale dhe / ose Operatorëve përkatës të Sistemit të Transmisionit, dhe jo për shkak të fajit të Palës dhe / ose Operatorëve përkatës të Sistemit të Transmisionit, e cila nuk mund të shmanget ose tejkalohet me largpamësi dhe diligjencë të arsyeshme, e cila nuk mund të zgjidhet me masa që janë nga pikëpamja teknike, financiare ose ekonomike arsyeshmërisht të mundshme për Palën dhe / ose Operatorët përkatës të Sistemit të Transmisionit, e cila ka ndodhur në të vërtetë dhe është e verifikueshme objektivisht, dhe që e bën të pamundur që Pala dhe / ose Operatorët përkatës të Sistemit të Transmisionit të përmbushin, përkohësisht ose përhershëm, detyrimet e saj.

Rregullat e Sistemit të Informacionit nënkuptojnë termat dhe kushtet për qasjen dhe përdorimin e Mjetit të Ankandit nga Pjesëmarrësit e Regjistruar siç publikohen në faqen e internetit të Platformës së Alokimit;

Çmimi Margjinal nënkupton çmimin e përcaktuar në Ankand përkatës që duhet të paguhet nga të gjithë Pjesëmarrësit e Regjistruar për çdo MW dhe orë të së Drejtës së fituar ditore të transmisionit;

Autoritetet Rregullatore Kombëtare nënkuptojnë autoritetet rregullatore të referuara në nenin 35 (1) të Direktivës 2009/72/KE ose, sipas rastit, legjislacionin e ngjashëm kombëtar;

Marrëveshja e Pjesëmarrjes nënkupton marrëveshjen, me të cilën Palët marrin përsipër të përmbushin termat dhe kushtet për alokimin e kapacitetit siç përfshihen në këto Rregulla të Alokimit;

Palë / Palët nënkupton Platformën e Alokimit dhe / ose një Pjesëmarrës i Regjistruar referuar individualisht si Palë ose kolektivisht si Palët;

E Drejta Fizike e Transmisionit nënkupton një të drejtë që i jep të drejtën mbajtësit të saj të transferojë fizikisht një vëllim të caktuar të energjisë elektrike në një periudhë të caktuar kohore ndërmjet dy Zonave Ofertuese në një drejtim specifik;

Periudha e Produktit nënkupton kohën dhe datën në të cilën fillon e drejta për të përdorur të Drejtën ditore të transmisionit dhe kohën dhe datën në të cilën e drejta për të përdorur të Drejtën ditore të transmisionit mbaron;

Pjesëmarrës i Regjistruar nënkupton një pjesëmarrës në treg i cili ka lidhur një Marrëveshje Pjesëmarrjeje me Platformën e Alokimit;

Dokumenti i të Drejtave nënkupton një dokument që përmban informacionin e shumës maksimale të të Drejtave të alokuara Fizike të Transmisionit (të identifikuar nga CAI) që mund të caktohen nga një pjesëmarrës i tregut për kufi të Zonës Ofertuese në ditë në orë dhe për drejtim, duke marrë parasysh vëllimin e të Drejtave ditore të transmisionit fillimisht të fituar dhe çdo shkurtim (ang.: curtailment) të mundshëm që ka ndodhur para lëshimit të Dokumentit të të Drejtave;

Dita e punës nënkupton ditët kalendarike nga e hëna deri të premten, me përjashtim të festave zyrtare siç specifikohet në faqen e internetit të Platformës së Alokimit;

Orari i punës nënkupton orët e specifikuara në Marrëveshjen e Pjesëmarrjes.

3. Në këto Rregulla të Alokimit, përfshirë anekset e tij, përveç nëse konteksti kërkon ndryshe:

(a) çdo referencë ndaj fjalës kufiri i Zonës Ofertuese mund të mbulojë të gjithë interkonektorët në mënyrë kolektive ose vetëm një ose një nëngrup të interkonektorit

(ëve) në këtë kufi të Zonës Ofertuese siç specifikohet në Aneksin 1 të këtyre Rregullave të Alokimit;

- (b) njëjësi tregon shumësin dhe anasjelltas;
- (c) referencat ndaj një gjinie përfshijnë të gjitha gjinitë e tjera;
- (d) tabela e përmbajtjes, titujt dhe shembujt janë futur vetëm për lehtësi dhe nuk ndikojnë në interpretimin e Rregullave të Alokimit;
- (e) fjala “përfshirë ” dhe variacionet e saj interpretohen pa kufizim;
- (f) çdo referencë ndaj legjislacionit, rregulloreve, direktivave, urdhrave, instrumenteve, kodeve ose ndonjë miratimi tjetër përfshin çdo modifikim, vazhdim rimiratim të tij, atëherë në fuqi;
- (g) çdo referencë ndaj një marrëveshje ose dokumenti tjetër, ose ndonjë akti ose instrumenti tjetër interpretohet si referencë ndaj asaj marrëveshje tjetër, ose dokumenti, akti ose instrumenti tjetër të ndryshuar, plotësuar, zëvendësuar ose rinovuar herë pas here;
- (h) referenca ndaj kohës është referencë ndaj kohës CET / CEST përveç nëse specifikohet ndryshe; dhe
- (i) kur Platformës së Alokimit i kërkohet të publikojë ndonjë informacion sipas këtyre Rregullave të Alokimit, ajo do ta bëjë këtë duke vënë informacionet ose të dhënat në dispozicion në faqen e saj të internetit dhe / ose përmes Mjetit të Ankandit.

Neni 3

Platforma e Alokimit

1. Platforma e Alokimit merr përsipër funksionet e alokimit në përputhje me këto Rregulla të Alokimit, legjislacionin në fuqi të Bashkimit Evropian ose aktet ligjore në fuqi të Komunitetit të Energjisë dhe / ose legjislacionin kombëtar të zbatueshëm të një ose më shumë vendeve kufitare të Zonës Ofertuese.
2. Për qëllimet e këtyre Rregullave të Alokimit, Platforma e Alokimit është pala që nënshkruan Marrëveshjen e Pjesëmarrjes me Pjesëmarrësin e Regjistruar.

Neni 4

Data e hyrjes në fuqi dhe zbatimi

1. Këto Rregulla të Alokimit hyjnë në fuqi në përputhje me regjimin e zbatueshëm rregullator kombëtar dhe në datën e shpallur nga Platforma e Alokimit.
2. Këto Rregulla të Alokimit zbatohen për Alokimin e Kapacitetit Ditor për të Drejtat ditore të transmisionit me periudhën e dorëzimit nga 01 janari 2023.
3. Aktivitetet e Platformës së Alokimit mbulojnë juridiksionet e OST-ve nga Bashkimi Evropian, OST-ve nga palët kontraktuese të Traktatit të Komunitetit të Energjisë dhe nga një ose më shumë vende të tjera. Referencat ndaj (a) OST ose Operatorit të Sistemit të Transmisionit pra përfshijnë referencat ndaj OST të BE-së, operatorëve të sistemit të Transmisionit nga palët kontraktuese të Traktatit të Komunitetit të Energjisë si dhe operatorët e sistemit të transmisionit

nga çdo vend tjetër për të cilin shërbimet ofrohen nga Platforma e Alokimit, dhe (b) ARrK ose Autoritetin Rregullator Kombëtar përfshijnë referencat ndaj ARrK të Bashkimit Evropian, ose ARrK nga palët kontraktuese të Traktatit të Komunitetit të Energjisë, ose rregullatorët e vendeve të tjera që kanë juridiksion mbi OST përkatëse ose Platformën e Alokimit.

KAPITULLI 2

Kërkesat dhe procesi për pjesëmarrje në Ankande

Neni 5

Dispozita e përgjithshme

1. Pjesëmarrësit e tregut mund të fitojnë të Drejtën ditore të transmisionit vetëm nga pjesëmarrja në Ankande.
2. Pjesëmarrja në Ankande kërkon që pjesëmarrësi i tregut të:
 - (a) lidh një Marrëveshje të Pjesëmarrjes të vlefshme dhe efektive në përputhje me nenet 6 deri në 13; dhe
 - (b) ketë qasje në Mjetin e Ankandit në përputhje me nenin 14.
3. Pjesëmarrja në Ankande kërkon që pjesëmarrësit e tregut, përveç kushteve të përcaktuara në paragrafin e mëparshëm, të përmbushin edhe kushtet e mëposhtme:
 - (a) të përputhen me kërkesat për sigurimin e kolateralit siç specifikohet në KAPITULLIN 3; dhe
 - (b) të pranojnë kushte shtesë financiare kur është e nevojshme në përputhje me nenin 15.
4. Në çdo rast, pjesëmarrësit e tregut duhet të përmbushin detyrimet siç përcaktohet në Kapitujt përkatës të këtyre Rregullave të Alokimit.

Neni 6

Lidhja e Marrëveshjes së Pjesëmarrjes

1. Të paktën nëntë (9) Ditë Pune para pjesëmarrjes së parë në një Ankand, çdo pjesëmarrës në treg mund të aplikojë për të qenë palë në një Marrëveshje Pjesëmarrjeje duke paraqitur në Platformën e Alokimit, dy (2) kopje të nënshkruara të Marrëveshjes së Pjesëmarrjes, në rast të nënshkrimit (eve) me dorë të publikuar në faqen e internetit të Platformës së Alokimit, së bashku me të gjitha informacionet dhe dokumentet e plotësuara në mënyrë të rregullt, të kërkuara nga nenet 7 deri në 14. Marrëveshja e pjesëmarrjes do të nënshkruhet në mënyrë alternative me nënshkrim (e) me dorë ose nënshkrim (e) të kualifikuar elektronik (QES). Platforma e Alokimit vlerëson plotësinë e informacionit të paraqitur në përputhje me nenet 8 dhe 11 brenda shtatë (7) Ditë Pune të pranimit të Marrëveshjes së Pjesëmarrjes të përfunduar dhe të nënshkruar.
2. Platforma e Alokimit para skadimit të afatit prej shtatë (7) Ditëve të Punës do të kërkojë nga pjesëmarrësi i tregut që të sigurojë çdo informacion të vonuar që pjesëmarrësi i tregut nuk arrin të paraqesë me Marrëveshjen e tij të Pjesëmarrjes. Pas marrjes së informacionit të vonuar, Platforma e Alokimit brenda shtatë (7) Ditëve shtesë të Punës rishikon informacionin dhe informon pjesëmarrësin e tregut nëse kërkohet ndonjë informacion i mëtejshëm.
3. Pasi Platforma e Alokimit të ketë marrë të gjithë informacionin e nevojshëm, ajo do të kthejë një kopje të Marrëveshjes së Pjesëmarrjes të nënshkruar nga ajo tek pjesëmarrësi i tregut pa vonesa të panevojshme. Nënshkrimi i Marrëveshjes së Pjesëmarrjes nga Platforma

e Alokimit nuk tregon në vetvete pajtueshmërinë me ndonjë kusht tjetër të vendosur në këto Rregulla të Alokimit për pjesëmarrjen në Ankande. Marrëveshja e Pjesëmarrjes hyn në fuqi në datën e nënshkrimit nga Platforma e Alokimit.

4. Është përgjegjësi e secilit pjesëmarrës në treg të sigurojë që ai është në përputhje me legjislacionin kombëtar, dhe kur është e zbatueshme, legjislacionin e Bashkimit Evropian ose aktet ligjore të Komunitetit të Energjisë, duke përfshirë kërkesat e çdo autoriteti përkatës kompetent, dhe të marrë të gjitha autorizimet e nevojshme në lidhje me pjesëmarrjen e tij në Ankande.

Neni 7

Forma dhe përmbajtja e Marrëveshjes së Pjesëmarrjes

1. Forma e Marrëveshjes së Pjesëmarrjes dhe kërkesat për plotësimin e saj publikohen nga Platforma e Alokimit dhe mund të ndryshohen herë pas here nga Platforma e Alokimit pa ndryshuar asnjë term dhe kusht të specifikuar në këto Rregulla të Alokimit, përveç nëse përcaktohet ndryshe në këto Rregulla të Alokimit.
2. Si minimum, Marrëveshja e Pjesëmarrjes do të kërkojë nga pjesëmarrësi i tregut të:
 - (a) sigurojë të gjithë informacionin e nevojshëm në përputhje me nenin 8 dhe nenin 11; dhe
 - (b) dakordohet të jetë i detyruar nga këto Rregulla të Alokimit dhe t'i respektojë ato.
3. Asgjë në këto Rregulla të Alokimit nuk e pengon Platformën e Alokimit dhe Pjesëmarrësin e Regjistruar të dakordohen me rregullat shtesë të Marrëveshjes së Pjesëmarrjes, jashtë fushës së këtyre Rregullave të Alokimit, duke përfshirë por pa u kufizuar në pjesëmarrjen në Alokimin Eksplicit Afatgjatë ose Brendaditor ose ndonjë proces alternativ (fallback) për Alokimin Implicit të një dite para.
4. Në rast të vështirësive në interpretim, kundërthënive ose paqartësive midis këtyre Rregullave të Alokimit dhe Marrëveshjes së Pjesëmarrjes, do të mbizotërojë teksti i Rregullave të Alokimit.

Neni 8

Dorëzimi i informacionit

1. Pjesëmarrësi i tregut, me Marrëveshjen e tij të Pjesëmarrjes të përfunduar dhe të nënshkruar, paraqet informacionin e mëposhtëm:
 - (a) emrin dhe adresën e regjistruar të pjesëmarrësit të tregut duke përfshirë emailin e përgjithshëm dhe numrin e telefonit të pjesëmarrësit të tregut për njoftime në përputhje me nenin 58.
 - (b) nëse pjesëmarrësi i tregut është person juridik, një ekstrakt të regjistrimit të pjesëmarrësit të tregut në regjistrin tregtar të autoritetit kompetent;
 - (c) detajet kontaktuese dhe emrat e personave të autorizuar për të përfaqësuar pjesëmarrësin e tregut dhe funksionin e tyre;
 - (d) Numrin e regjistrimit të TVSH-së të BE-së ose informacion të ngjashëm identifikimi tatimor ku TVSH-ja e BE-së nuk zbatohet;

- (e) Taksat dhe ngarkesat që duhet të merren parasysh për llogaritjet e faturave dhe kolateralit;
 - (f) Kodin e Identifikimit të Energjisë (EIC);
 - (g) informacionin e llogarisë bankare për pagesë tek aplikanti për t'u përdorur nga Platforma e Alokimit për qëllimet e nenit 49, paragrafi 7;
 - (h) personin kontaktues financiar për kolateralet, faturimin dhe çështjet e pagesës, dhe detajet e tij/saj kontaktuese (email dhe numri i telefonit) për njoftimet kur kërkohet në këto Rregulla të Alokimit në përputhje me nenin 58;
 - (i) personin kontaktues komercial dhe detajet e tij/saj kontaktuese (email dhe numri i telefonit) për njoftimet kur kërkohet në këto Rregulla të Alokimit në përputhje me nenin 58;
 - (j) personin kontaktues operacional dhe detajet e tij/saj kontaktuese (email dhe numri i telefonit) për njoftime kur kërkohet në këto Rregulla të Alokimit në përputhje me nenin 58; dhe
 - (k) Kodi i Regjistrimit ACER (Kodi ACER) i caktuar nga Agjencia Evropiane për Bashkëpunimin e Rregullatorëve të Energjisë (ACER) gjatë procesit të regjistrimit të pjesëmarrësve të tregut me ARrK, për pjesëmarrje në alokimin në kufijtë e Zonës Ofertuese të renditur në Shtojcën 2.
2. Pjesëmarrësi i Regjistruar sigurohet që të gjitha të dhënat dhe informatat e tjera që ia ofron Platformës së Alokimit në përputhje me këto Rregulla të Alokimit (përfshirë informatat në Marrëveshjen e tij të Pjesëmarrjes) janë dhe mbeten të sakta dhe të plota në të gjitha aspektet materiale dhe e njofton menjëherë Platformën e Alokimit për çdo ndryshim.
 3. Pjesëmarrësi i Regjistruar e njofton Platformën e Alokimit nëse ka ndonjë ndryshim në informatat e paraqitura në përputhje me paragrafin 1 të këtij neni, të paktën nëntë (9) Ditë Pune para se ndryshimi të hyjë në fuqi dhe, kur kjo nuk është e mundur, pa vonesë pasi Pjesëmarrësi i Regjistruar të vihet në dijeni të ndryshimit.
 4. Platforma e Alokimit e konfirmon regjistrimin e ndryshimit ose i dërgon Pjesëmarrësit të Regjistruar një shënim refuzimi të regjistrimit të ndryshimit, më së voni, shtatë (7) Ditë Pune pas marrjes së njoftimit përkatës të ndryshimit. Shënimi i konfirmimit ose refuzimit do të dërgohet nëpërmjet mjeteve elektronike siç specifikohet nga Platforma e Alokimit në faqen e saj të internetit. Nëse Platforma e Alokimit refuzon të regjistrojë ndryshimin, arsyeja jepet në shënimin e refuzimit.
 5. Ndryshimi bëhet i vlefshëm në ditën e dorëzimit të konfirmimit të Pjesëmarrësi i Regjistruar.
 6. Nëse kërkohen informata shtesë nga një Pjesëmarrës i Regjistruar si pasojë e një ndryshimi në këto Rregulla të Alokimit, atëherë Pjesëmarrësi i Regjistruar i paraqet informatat shtesë Platformës së Alokimit brenda dymbëdhjetë (12) ditëve të punës pas kërkesës për paraqitje të tillë nga Platforma e Alokimit.

Neni 9
Garancitë

1. Me nënshkrimin e Marrëveshjes së Pjesëmarrjes, pjesëmarrësi i tregut garanton që:
 - (a) nuk ka filluar ndonjë procedurë që kërkon një gjykim të insolvencës ose falimentimit ose ndonjë lehtësim tjetër sipas ndonjë ligji të falimentimit ose insolvencës ose ndonjë ligji tjetër të ngjashëm që ndikon në të drejtat e kreditorëve;
 - (b) asnjë procedurë insolvence, falimentimi ose procedurë tjetër e ngjashme ligjore që prek të drejtat e kreditorëve nuk ka filluar në lidhje me aplikantin;
 - (c) asnjë procedurë e mbylljes ose likuidimit nuk ka filluar në lidhje me aplikantin; dhe
 - (d) nuk ka detyrime pagese të prapambetura ndaj Platformës së Alokimit.

Neni 10

Llogaria e dedikuar e Biznesit

Si pjesë e paraqitjes së informacionit në përputhje me nenin 6 dhe nenin 8, një Llogari Biznesi e dedikuar vihet në dispozicion të pjesëmarrësit të tregut për qëllime të depozitimit të kolateraleve në para dhe/ose për qëllime të kryerjes së pagesave mbi bazën e përshkruar në nenin 49.

Neni 11

Pranimi i Rregullave të Sistemit të Informacionit

Me nënshkrimin e Marrëveshjes së Pjesëmarrjes, pjesëmarrësi i tregut pranon Rregullat e zbatueshme të Sistemit të Informacionit, të ndryshuara herë pas here dhe të publikuara në faqen e internetit të Platformës së Alokimit.

Neni 12

Kostot në lidhje me Marrëveshjen e Pjesëmarrjes

Të gjitha aplikimet për t'u bërë Pjesëmarrës i Regjistruar dhe çdo pjesëmarrje pasuese në Ankande bëhen me koston, shpenzimet dhe rrezikun e Pjesëmarrësit të Regjistruar. Platforma e Alokimit nuk është përgjegjëse ndaj asnjë personi për ndonjë kosto, dëmtim ose shpenzim në lidhje me Pjesëmarrësin e Regjistruar që merr pjesë në Ankande përveç nëse përcaktohet ndryshe shprehimisht në këto Rregulla të Alokimit.

Neni 13

Refuzimi i aplikimit

Platforma e Alokimit mund të refuzojë të hyjë në një Marrëveshje të Pjesëmarrjes me një pjesëmarrës tregu në rrethanat e mëposhtme:

- (a) kur aplikanti nuk ka paraqitur një Marrëveshje të Pjesëmarrjes të kompletuar dhe të nënshkruar në mënyrë të rregullt, në përputhje me nenet 6, 7 dhe 8; ose
- (b) Platforma e Alokimit ka ndërprerë më parë një Marrëveshje të Pjesëmarrjes me aplikantin si rezultat i një shkelje të Marrëveshjes së Pjesëmarrjes nga Pjesëmarrësi i Regjistruar në përputhje me nenin 56 (3) dhe (4) dhe përveç nëse rrethanat që çojnë në ndërprerje kanë pushuar të ekzistojë ose Platforma e Alokimit është bindur arsyeshëm që shkelja nuk do të ndodhë më; ose
- (c) nëse hyrja në një Marrëveshje të Pjesëmarrjes me aplikantin do të bënte që Platforma e Alokimit të shkelte ndonjë kusht të ndonjë kërkesë të detyrueshme ligjore ose rregullative; ose

- (d) nëse ndonjë nga garancitë e Pjesëmarrësit të Regjistruar sipas nenit 9 rezulton se është e pavlefshme ose e rremë;
- (e) nëse aplikanti është nën sanksione ekonomike dhe tregtare të cilat mund të kenë ndikim të rëndësishëm në Platformën e Alokimit.

Neni 14

Qasja në Mjetin e Ankandit

1. Platforma e Alokimit lejon qasjen në Mjetin e Ankandit falas nëse plotësohen kërkesat e mëposhtme:
 - (a) Pjesëmarrësi i Regjistruar ka nënshkruar dhe dorëzuar një formular të plotësuar të përfshirë në Rregullat e Sistemit të Informacionit duke identifikuar personat për të cilët krijohen llogaritë e përdoruesit në Mjetin e Ankandit; dhe
 - (b) Pjesëmarrësi i Regjistruar ka përmbushur kërkesat për autentifikim siç përcaktohen nga Rregullat e Sistemit të Informacionit të publikuara nga Platforma e Alokimit;
2. Platforma e Alokimit konfirmon krijimin e llogarisë së përdoruesit ose mund t'ia dërgojë Pjesëmarrësit të Regjistruar një shënim refuzimi, më së voni, pesë (5) ditë pune pas marrjes së formularit përkatës të nënshkruar dhe të plotësuar nga Pjesëmarrësi i Regjistruar. Shënimi i konfirmimit ose refuzimit do të dërgohet nëpërmjet mjeteve elektronike siç specifikohet nga Platforma e Alokimit në faqen e saj të internetit.
3. Platforma e Alokimit dërgon shënimin e refuzimit të arsyetuar në mënyrë të rregullt nëse kërkesat e renditura në paragrafin 1 të këtij neni nuk janë përmbushur dhe qasja në Mjetin e Ankandit nuk do të jepet.

Neni 15

Lidhja e kushteve shtesë financiare

Platforma e Alokimit mund të zhvillojë dhe të publikojë kushte shtesë standarde financiare për t'u pranuar nga Pjesëmarrësit e Regjistruar. Këto kushte shtesë financiare mund të përfshijnë dispozita për të mundësuar kolaterale të përbashkëta për procese të tjera të organizuara nga Platforma e Alokimit në përputhje me Marrëveshjen e Pjesëmarrjes, për sa kohë që këto kushte shtesë financiare janë në përputhje me këto Rregulla të Alokimit.

Neni 16

Kërkesat rregullatore dhe ligjore

Është përgjegjësi e secilit pjesëmarrës të tregut të sigurohet se është në përputhje me legjislacionin kombëtar dhe, kur është e zbatueshme, legjislacionin e Bashkimit Evropian ose aktet ligjore të Komunitetit të Energjisë, duke përfshirë kërkesat e çdo autoriteti përkatës kompetent, dhe se ka marrë të gjitha autorizimet e nevojshme në lidhje me pjesëmarrjen e tij/saj në Ankande ose në përdorimin e të Drejtave ditore të transmisionit.

KAPITULLI 3

Kolateralet

Neni 17

Dispozitat e përgjithshme

1. Pjesëmarrësit e Regjistruar ofrojnë kolaterale për të siguruar pagesat për Platformën e Alokimit që rezultojnë nga Ankandet e të Drejtave Ditore të Transmisionit dhe, nëse është e aplikueshme, pagesat tjera të mundshme që duhet të paguhen sipas kushteve financiare shtesë në përputhje me nenin 15.
2. Pranoen vetëm format e mëposhtme të kolateralit:
 - (a) Garancia Bankare;
 - (b) Depozita e parave në një llogari të dedikuar të biznesit.
3. Kolateralet mund të ofrohen në njërin prej formave të referuara në paragrafin 2 të këtij neni ose si kombinim i këtyre formave, me kusht që Platforma e Alokimit të ketë të drejtën si përfutjes i kolateralit të plotë.
4. Limiti i kreditit duhet të jetë gjithmonë më i madh ose i barabartë me zero.
5. Kolateralet duhet të ofrohen në monedhën Euro (€).

Neni 18

Forma e depozitës së parave

Për kolateralet që ofrohen në formë të depozitës së parave në llogari të dedikuar të biznesit aplikohen kushtet e mëposhtme:

- (a) paratë duhet të depozitohen në një llogari të dedikuar të biznesit në një institucion financiar të përzgjedhur nga Platforma e Alokimit;
- (b) Llogaria e dedikuar e biznesit hapet dhe përdoret sipas kushteve financiare shtesë, në përputhje me nenin 15;
- (c) deri në tërheqje, siç lejohet nga dispozitat e mëposhtme të nenit 24, depozita në para të gatshme në Llogarinë e dedikuar të Biznesit i përket Pjesëmarrësit të Regjistruar nëse nuk përcaktohet ndryshe në kushtet shtesë financiare në përputhje me nenin 15;
- (d) tërheqjet nga llogaria e dedikuar e biznesit në përputhje me nenin 22 dhe nenin 24 mund të realizohen vetëm me udhëzimin e Platformës së Alokimit;
- (e) Llogaria e dedikuar e biznesit mund të shfrytëzohet si shtesë për shlyerjet e borxheve, siç përcaktohet në nenin 49; dhe
- (f) interesi në shumën e depozituar në Llogarinë e dedikuar të biznesit rritet në dobi të Pjesëmarrësit të Regjistruar, pas zbritjes së taksave dhe tarifave bankare nëse ka.

Forma e garancisë bankare

1. Kolateralet që ofrohen në formën e një garancie bankare duhet të jenë në përputhje me specifikimet e mëposhtme:
 - (a) Garancia bankare ofrohet në formën e shabllonit, që është i disponueshëm në faqen e internetit të Platformës së Alokimit, dhe duhet të përditësohet herë pas here, apo duhet të jetë në formën që ndjek në thelb shabllonin;
 - (b) Garancia bankare duhet të jetë e shkruar në gjuhën angleze;
 - (c) Garancia Bankare mbulon të gjitha ankandet e organizuara nga Platforma e Alokimit sipas kushteve financiare shtesë, në përputhje me nenin 15;
 - (d) Garancia bankare duhet të lejojë tërheqjet e pjesshme dhe të shumëfishta nga Platforma e Alokimit, deri në shumën maksimale të garantuar;
 - (e) Garancia bankare parashikon pagesën pas kërkesës së parë të Platformës së Alokimit. Ajo duhet të parashikojë më tej që, nëse Platforma e Alokimit kërkon Garancinë Bankare, banka duhet të paguajë automatikisht pa asnjë kusht tjetër përveç marrjes së kërkesës të dërguar nga SWIFT përmes bankës ndërmjetëse që konfirmon se nënshkrimet në kërkesë duket të jenë në përputhje me ekzemplarët e mbajtur nga banka;
 - (f) Garancia bankare është e parevokueshme, e pakushtëzuar dhe e patransferueshme;
 - (g) Garancia bankare mund të përfshijë si alternativë nënshkrimet e bëra me dorë ose nënshkrimet elektronike të kualifikuara (QES) nga banka emetuese. Në rast se Garancia Bankare nënshkruhet me nënshkrim(-e) elektronik të kualifikuar (QES), të gjitha ndryshimet e mëposhtme nënshkruhen me nënshkrim(-e) elektronik të kualifikuar (QES);
 - (h) Banka që lëshon Garancinë Bankare duhet të jetë e themeluar në mënyrë të përhershme, duke përfshirë përmes një dege në një shtet anëtar të BE-së, në Zonën Ekonomike Evropiane, Palën Kontraktuese të Komunitetit të Energjisë, Vendin Vëzhgues të Komunitetit të Energjisë ose në Zvicër, si dhe duhet të jetë e pranueshme për bankën e biznesit të Platformës së Alokimit;
 - (i) Banka që lëshon Garancinë Bankare ose grupi financiar të cilit i përket duhet të ketë një vlerësim afatgjatë të kredisë prej jo më pak se BBB- nga Standard and Poor's Corporation, BBB- nga Fitch ose Baa3 nga Moody's Investors Service Inc. Nëse banka emetuese ose grupi financiar, të cilit i përket banka emetuese, pushon së patur vlerësimin e kërkuar afatgjatë të kredisë, Pjesëmarrësi i Regjistruar brenda pesë (5) ditëve të punës duhet të dorëzojë në Platformën e Alokimit një garanci bankare zëvendësuese nga një bankë e cila respekton normën e kërkuar afatgjatë të vlerësimit të kreditit ose e zëvendëson Garancisë Bankare me depozitë. Nëse ka rënie në klasifikimin e institucioneve financiare në tërë industrinë, Platforma e Alokimit mund të hetojë se cilat janë standardet e reja dhe, sipas gjykimit të saj, nëse e sheh të nevojshme, të ulë nivelin e vlerësimit të kërkuar për një periudhë të kufizuar kohore, duke informuar Operatorët e Sistemit të Transmisionit dhe duke i kërkuar atyre të informojnë Autoritetet Rregullatore Kombëtare.

- (j) Banka e cila lëshon Garancinë Bankare nuk duhet të jetë filial i Pjesëmarrësit të Regjistruar të cilit i është lëshuar Garancia Bankare.
2. Garancia bankare duhet të përmbajë si në vijim:
- (a) shumën maksimale të garantuar;
 - (b) identifikimin e Platformës së Alokimit si përfitues, siç specifikohet në faqen e internetit të Platformës së Alokimit;
 - (c) llogarinë bankare të Platformës së Alokimit, siç specifikohet në faqen e internetit të Platformës së Alokimit;
 - (d) adresën e bankës së Platformës së Alokimit, siç specifikohet në faqen e internetit të Platformës së Alokimit;
 - (e) identifikimin e plotë të Pjesëmarrësit të Regjistruar, duke përfshirë emrin, adresën, regjistrin tregtar/të kompanive;
 - (f) identifikimin e plotë të bankës siguroese; dhe
 - (g) kohën e vlefshmërisë.
3. Pjesëmarrësi i Regjistruar dorëzon garancinë bankare së paku katër (4) ditë pune para mbylljes së periudhës së ofertimit të ankandit, për të cilin do të përdoret si kolateral, ose përndryshe do të konsiderohet për ankandet e mëvonshme.
4. Platforma e Alokimit pranon garancinë bankare të ofruar nga Pjesëmarrësi i Regjistruar nëse garancia bankare është ofruar në përputhje me specifikimet e përcaktuara në paragrafin 1 dhe 2 të këtij neni dhe, në rast se garancia bankare përfshin nënshkrimin(-et) me dorë, kopja origjinale e garancisë bankare është marrë nga Platforma e Alokimit.
5. Platforma e Alokimit konfirmon pranimin e garancisë bankare ose i dërgon një shënim refuzimi Pjesëmarrësit të Regjistruar më së voni katër (4) ditë pune pas pranimit të kopjes origjinale të garancisë bankare. Shënimi i konfirmimit ose refuzimit dërgohet përmes mjeteve elektronike siç specifikohet nga Platforma e Alokimit në faqen e saj të internetit. Shënimi i refuzimit duhet të përfshijë arsyetimin e refuzimit.

Neni 20

Vlefshmëria dhe ripërtëritja e garancisë bankare

1. Kolaterale të formës së garancisë bankare duhet të jenë të vlefshme për një periudhë minimale prej së paku tridhjetë (30) ditë pas përfundimit të muajit kalendarik të periudhës së produktit.
2. Gjatë kësaj periudhe, Pjesëmarrësi i Regjistruar duhet të mbajë gjatë gjithë kohës kolaterale të formës së një garancie bankare, e cila përfshin detyrimin e Pjesëmarrësit të Regjistruar për t'i zëvendësuar ose ripërtërirë ato sipas nevojës.

Neni 21

Limiti i kreditit

1. Platforma e Alokimit llogarit dhe përditëson vazhdimisht Limitin e Kreditit të secilit Pjesëmarrës të Regjistruar në lidhje me çdo Ankand të mëpasshëm. Limiti i kreditit duhet të jetë i barabartë me shumën e kolateraleve të vendosura, minus detyrimet e pagesave të papaguara. Në rastin e garancisë bankare, kjo garanci bankare do të merret parasysh vetëm nëse plotësohen kërkesat e nenit 20 në lidhje me vlefshmërinë e saj për ankandin përkatës. Platforma e Alokimit do ta vë këtë

informacion në disponim të secilit Pjesëmarrës të Regjistruar individualisht përmes Mjetit të Ankandit.

2. Detyrimet e pagesave të papaguara llogariten sipas nenit 47, duke iu nënshtruar rregullave shtesë në paragrafin 3 dhe 4 të këtij neni dhe në nenin 32.
3. Me qëllim të llogaritjes së limitit të kreditit, detyrimet e pagesave të papaguara rriten për të përfshirë taksat dhe ngarkesat në fuqi, sipas nenit 48.
4. Detyrimet maksimale të pagesës për një Pjesëmarrës të Regjistruar, që rezultojnë nga ofertat e tij të regjistruara gjatë mbylljes së periudhës së ofertimit, të llogaritura sipas nenit 32, do të konsiderohen përkohësisht si detyrime pagese të papaguara. Nga publikimi i rezultateve të ankandit, shumat e detyrimit e njoftuar sipas paragrafi 3(b) dhe (c) të nenit 34 do të konsiderohet si detyrim pagese i papaguar për llogaritjen e limitit të kreditit për secilin ankand të njëkohshëm dhe limiti i kreditit do të rishikohet në bazë të të Drejtave Ditore të alokuara të Transmisionit.

Neni 22

Modifikimi i kolateraleve

1. Pjesëmarrësi i Regjistruar në çdo kohë mund të kërkojë me shkrim rritjen e kolateraleve në formë të garancisë bankare, zvogëlim të kolateraleve në formë të garancisë bankare dhe/ose depozitës ose ndryshim të formës së kolateraleve në përputhje me paragrafët 2 dhe 3 të këtij neni.
2. Zvogëlimi i kolateraleve të një Pjesëmarrësi të Regjistruar lejohet vetëm nëse limiti i kreditit pas aplikimit për zvogëlimin e kërkuar të kolateraleve do të ishte më i madh ose i barabartë me zero.
3. Platforma e Alokimit pranon modifikimin e kolateraleve nëse kërkesa për modifikim të kolateraleve është në përputhje me kushtin e përcaktuar në paragrafin 2 të këtij neni në rast zvogëlimi ose me kushtet e përcaktuara në nenet 19 dhe 20 në rast të rritjes së kolateraleve në formën e një garancie bankare dhe në rast të një ndryshimi në formën e kolateraleve nga paratë e depozituara në garanci bankare.
4. Modifikimi i kolateraleve bëhet i vlefshëm dhe efektiv vetëm kur Platforma e Alokimit ka bërë modifikimin e kërkuar të kolateraleve të Pjesëmarrësit të Regjistruar brenda mjetit të Ankandit.
5. Platforma e Alokimit vlerëson kërkesën për modifikimin e kolateraleve dhe konfirmon pranimin ose i dërgon një shënim refuzimi Pjesëmarrësit të Regjistruar më së voni dy (2) ditë pune pas pranimit të kërkesës. Shënimi i konfirmimit ose refuzimit dërgohet përmes mjeteve elektronike siç specifikohet nga Platforma e Alokimit në faqen e saj të internetit. Shënimi i refuzimit duhet të përfshijë arsyetimin e refuzimit.

Neni 23

Incidenti i kolateralit

1. Incidenti i kolateralit ndodhë në rastet e mëposhtme:
 - (a) kolateralet janë të pamjaftueshme për të siguruar shumën e detyrimit për të drejtat ditore të transmisionit të mbajtura nga një Pjesëmarrës i Regjistruar në datën e pagesës së radhës siç përcaktohet në nenin 49, duke marrë parasysh shumën dhe vlefshmërinë e kolateraleve; ose
 - (b) kolateralet nuk mbahen në përputhje me paragrafin 2 të nenit 20; ose

- (c) kolaterale nuk janë rikthyer pas incidentit të pagesës në përputhje me nenin 24 ose është ofruar kolateral i ri që nuk është në përputhje me kushtet e specifikuar në nenet 17(3), 18 dhe 19.
2. Platforma e Alokimit njofton Pjesëmarrësit e Regjistruar për incidentin e kolateralit me mjete elektronike siç specifikohet nga Platforma e Alokimit në faqen e saj të internetit. Pjesëmarrësi i Regjistruar rritë kolaterale të tij brenda dy (2) ditëve të punës nga momenti i dërgimit të njoftimit, nëse kjo bëhet gjatë orarit të punës ose gjatë dy (2) ditëve të punës, duke filluar nga dita tjetër e punës nëse dërgohet pas orarit të punës. Nëse kolaterale të ofruara nga Pjesëmarrësi i Regjistruar mbeten të pamjaftueshme pas kësaj periudhe, Platforma e Alokimit mund të pezullojë ose të ndërprejë Marrëveshjen e Pjesëmarrjes në përputhje me nenet 55 dhe 56.

Neni 24

Thirrjet e kolateraleve

1. Platforma e Alokimit ka të drejtë të thirrë kolaterale të një Pjesëmarrësi të Regjistruar në rast të ndonjë incidenti të regjistruar pagese në përputhje me nenin 51.
2. Pjesëmarrësi i Regjistruar rikthen kolaterale të tij pas incidentit të pagesës ose incidentit të kolateraleve duke respektuar kushtet e përcaktuara në nenet 17(3), 18 dhe 19, përveç nëse Marrëveshja e Pjesëmarrjes pezullohet ose ndërpritet në përputhje me nenet 55 dhe 56.

KAPITULLI 4

Ankandet

Neni 25

Dispozitat e përgjithshme për Ankande

1. Platforma e Alokimit i alokon Pjesëmarrësit e Regjistruar të Drejtat Ditore të Transmisionit me anë të Alokimit Eksplisit. Para Ankandit, Platforma e Alokimit publikon Specifikimet e Ankandit në faqen e saj të internetit.
2. Ankandet organizohen nëpërmjet mjetit të ankandit. Secili Pjesëmarrës i Regjistruar që plotëson kriteret për pjesëmarrje në ankand mund të vendosë oferta në mjetin e ankandit derisa të skadojë afati përkatës për vendosjen e ofertave në ankand specifik, sipas Specifikimit përkatës të Ankandit.
3. Pasi të skadojë afati përkatës për vendosjen e ofertave në ankandin specifik, Platforma e Alokimit shqyrton ofertat duke përfshirë edhe limitet përkatëse të kreditit të Pjesëmarrësve të Regjistruar. Rezultatet e Ankandit i komunikohen Pjesëmarrësve të Regjistruar përmes mjetit të ankandit.

Neni 26

Afati kohor i alokimit të kapaciteteve dhe forma e produktit

1. Afati kohor i Alokimit të Kapacitetit që i nënshtrohet këtyre Rregullave të Alokimit dhe që i nënshtrohet disponueshmërisë së produktit është afati kohor ditor i cili përbëhet prej çdo ore individuale përgjatë 24 orëve të një dite kalendarike (23, përkatësisht 25 orë kur ndryshon ora e kursimit të ditës). Në një Ankand të Drejtat Fizike të Transmisionit alokohen veçmas për secilën orë individuale të Periudhës së Produktit, prandaj mund të ofrohen sasi të ndryshme të MW/orë dhe mund të vendosen oferta të veçanta dhe mund të alokohen sasi të ndryshme të MW/orë.
2. Ankandi ditor do të mbahet në baza ditore në ditën në ditën që i paraprin ditës së dorëzimit (e hënë- e diel).

Neni 27

Specifikimet e Ankandit

1. Platforma e Alokimit publikon Specifikimin e Ankandit siç përcaktohet në paragrafin 2 të këtij neni jo më vonë se në ora 09:00 të ditës pararendëse të ditës së dorëzimit.
2. Specifikimi i Ankandit duhet të theksojë në veçanti:
 - (a) kodin që identifikon Ankandin në mjetin e ankandit;
 - (b) identifikimin e kufirit(-ve) të zonës së ofertimit ose një nëngrupi të interkonektorëve në kufirin e zonës së ofertimit dhe drejtimin e mbuluar;
 - (c) periudhën e produktit;
 - (d) periudhën e ofertimit e cila në rast të kushteve të rregullta operative fillon në orën 09:00 dhe përfundon në orën 09:30 të ditës pararendëse të ditës së dorëzimit;

- (e) afatin për publikimin e rezultateve të përkohshme të ankandit, që në rast të kushteve të rregullta operative është ora 09:32 e mëngjesit të ditës pararendëse të ditës së dorëzimit;
- (f) afatin për publikimin e rezultateve përfundimtare të ankandit, që në rast të kushteve të rregullta operative është ora 10:00 e ditës pararendëse të ditës së dorëzimit;
- (g) kapacitetin e ofruar, që duhet të përfshijë kapacitetin ndër-zonal të publikuar në përputhje me nenet 55 dhe 56; dhe
- (h) çfarëdo informacioni ose terma tjetër përkatës të zbatueshëm për produktin ose ankandin.

Neni 28

Dorëzimi i ofertave

1. Pjesëmarrësi i Regjistruar dorëzon ofertën ose grupin e ofertave në Platformën e Alokimit në përputhje me kërkesat e mëposhtme:
 - (a) duhet të dorëzohet në mënyrë elektronike duke përdorur mjetin e ankandit dhe gjatë periudhës së ofertimit siç specifikohet në Specifikimin e Ankandit;
 - (b) duhet të identifikojë Ankandin përmes një kodi identifikimi siç specifikohet në paragrafin 2(a) të nenit 27;
 - (c) duhet të identifikojë Pjesëmarrësin e Regjistruar që dorëzon ofertën përmes kodit EIC;
 - (d) duhet të identifikojë kufirin e Zonave të Ofertimit dhe drejtimin për të cilin dorëzohet oferta;
 - (e) duhet të theksojë çmimin e ofertës, i cili duhet të jetë i ndryshëm për secilën ofertë të njëjtit Pjesëmarrës të Regjistruar, pa taksa dhe ngarkesa, në monedhën Euro për MW/orë të Periudhës së Produktit, d.m.th. Euro/MW/orë, e shprehur në maksimumi prej dy (2) presje dhjetore dhe të barabarta ose më të mëdha se zero;
 - (f) duhet të theksojë sasinë e ofertës në MW të plotë, e cila duhet të shprehet pa presje dhjetore, shuma minimale e një oferte të vetme është një (1) MW.
2. Pjesëmarrësi i Regjistruar mund të modifikojë ofertën e tij të regjistruar më parë ose grupin e ofertave në çdo kohë gjatë periudhës së ofertimit, duke përfshirë anulimin e saj. Në rast se oferta është modifikuar, për përcaktimin e rezultateve të ankandit merret parasysh vetëm modifikimi i fundit i vlefshëm i ofertës ose grupit të ofertave.
3. Nëse sasia e ofertës, ose sasia e llogaritur si shumë e sasisë së ofertës për disa oferta të dorëzuara për të njëjtin ankand gjatë periudhës së ofertimit, nga Pjesëmarrësi i Regjistruar tejkalon kapacitetin e ofruar të shpallur në Specifikimin e Ankandit, atëherë kjo ofertë ose këto oferta refuzohen plotësisht. Në rastin kur modifikimi i ofertave të dorëzuara më parë rezulton në tejkalimin e kapacitetit të ofruar, modifikimi refuzohet, ndërsa ofertat e regjistruara më parë do të qëndrojnë.

Neni 29

Regjistrimi i ofertës

1. Platforma e Alokimit nuk regjistron ofertën që:

- (a) nuk është në pajtueshmëri me kërkesat e Nenit 28; ose
 - (b) është dorëzuar nga Pjesëmarrësi i Regjistruar i cili është suspenduar në përputhje me Nenin 55.
2. Në rast se oferta ose grupi i ofertave përmbushë kërkesat e përcaktuara në Nenet 28, Platforma e Alokimit i konfirmon Pjesëmarrësit të Regjistruar që oferta(-at) e tillë është regjistruar saktë me një konfirmim të pranimit nëpërmjet mjetit të ankandit. Nëse Platforma e Alokimit nuk lëshon konfirmimin për pranimin e një oferte, kjo ofertë do të konsiderohet se nuk është regjistruar.
 3. Platforma e Alokimit njofton Pjesëmarrësin e Regjistruar, oferta e të cilit është refuzuar si e pavlefshme si dhe arsyen e këtij refuzimi, pa vonesa të panevojshme pas refuzimit të ofertës.
 4. Platforma e Alokimit mbanë një regjistër të të gjitha ofertave të vlefshme të pranuar.
 5. Secila ofertë e vlefshme e regjistruar në mbyllje të periudhës së ofertimit përbën ofertë të pakushtëzuar dhe të përvokueshme nga Pjesëmarrësi i Regjistruar për të blerë të drejtat ditore të transmisionit deri në sasinë e ofertës dhe me çmime deri në çmimin e ofertës, dhe sipas kushteve dhe termave të këtyre Rregullave të Alokimit dhe Specifikimeve përkatëse të Ankandit.

Neni 30

Oferta e paracaktuar

1. Pjesëmarrësi i Regjistruar ka opcionin të vendosë oferta të paracaktuara për ankande.
2. Oferta e paracaktuar, pasi të identifikohet si e tillë nga Pjesëmarrësi i Regjistruar, zbatohet automatikisht për çdo ankand të mëposhëm përkatës siç përcaktohet nga Pjesëmarrësi i Regjistruar kur vendos ofertën e paracaktuar. Gjatë hapjes së periudhës përkatëse të ofertimit, oferta e regjistruar e paracaktuar konsiderohet si ofertë e dorëzuar nga Pjesëmarrësi i Regjistruar për ankandin përkatës. Kjo ofertë konsiderohet si e dorëzuar kur Platforma e Alokimit i dërgon Pjesëmarrësit të Regjistruar konfirmimin e pranimit.
3. Nëse sasia e paracaktuar e ofertës ose sasia e llogaritur si shumë e sasisë së ofertës për disa oferta të paracaktuara të dorëzuara për të njëjtin ankand nga Pjesëmarrësi i Regjistruar tejkalon kapacitetin final të ofruar, ofertat me çmimin më të ulët të ofertës refuzohen një (1) nga një (1) derisa sasia totale e lejuar e ofertës të jetë më e ulët ose e barabartë me kapacitetin e ofruar.
4. Pjesëmarrësi i Regjistruar që dëshiron të modifikojë ofertën e paracaktuar për një ankand të ardhshëm duhet të ndryshojë sasinë e ofertës dhe çmimin e ofertës së ofertave të tij të paracaktuara përpara hapjes së periudhës së ofertimit të ankandit të aplikueshëm.
5. Pjesëmarrësi i Regjistruar që nuk dëshiron të dorëzojë ofertën e paracaktuar në mjetin e ankandit për ankandet e ardhshme, mund të anulojë ofertat e tij të paracaktuara përpara hapjes së periudhës pasuese të ofertimit të ankandit.

Neni 31

Oferta e paracaktuar për Ankandin rezervë/alternativ

Në rast se zhvillohet një Ankand rezervë në përputhje me Nenin 42, ofertat e paracaktuara të dorëzuara deri në orën 14:00 të D-2 përdoren si oferta të paracaktuara për Ankandin rezervë.

Neni 32

Verifikimi i limitit të kreditit

1. Me rastin e dorëzimit të një oferte ose një grupi ofertash nga Pjesëmarrësi i Regjistruar në mjetin e ankandit, Platforma e Alokimit kontrollon nëse detyrimet maksimale të pagesës (MPO) që lidhen me ofertën(-at) e regjistruara të atij Pjesëmarrësi të Regjistruar të llogaritura sipas paragrafëve 4 dhe 5 të këtij neni në kohën e dorëzimit të ofertave tejkalojnë limitin e kredisë. Nëse detyrimi maksimal i pagesës në lidhje me ofertat e tilla të regjistruara tejkalojnë limitin e kredisë, Platforma e Alokimit nxjerr automatikisht, nëpërmjet mjetit të ankandit, një paralajmërim për pjesëmarrësin e regjistruar për të modifikuar limitin e kredisë. Ofertat nuk refuzohen automatikisht nëse detyrimi maksimal i pagesës që i atribuohet ofertave të regjistruara tejkalojnë limitin e kredisë gjatë dorëzimit të ofertës, por vetëm pas procesit të përshkruar në paragrafin 2 të këtij neni.
2. Në mbyllje të periudhës së ofertimit, Platforma e Alokimit kontrollon sërish nëse detyrimet maksimale të pagesës lidhur me ofertat e regjistruara të llogaritura sipas paragrafit 5 të këtij neni e kalojnë limitin e kredisë. Nëse detyrimet maksimale të pagesës në lidhje me këto oferta tejkalojnë limitin e kredisë, këto oferta, duke filluar me ofertën me çmimin më të ulët të ofertës, do të përjashtohen një (1) nga një (1) derisa detyrimet maksimale të pagesës të jenë më të ulëta ose barazi me limitin e kredisë.
3. Platforma e Alokimit tregon kolateralet e pamjaftueshme si arsye për përjashtimin e ofertës në njoftimin e rezultateve të ankandit drejtuar Pjesëmarrësit të Regjistruar.
4. Platforma e Alokimit vlerëson në mënyrë të vazhdueshme të gjitha ofertat, pavarësisht se në cilin ankand dhe në cilin kufi të zonës së ofertimit dhe drejtim janë dorëzuar ato. Në rast se kemi oferta të lidhura me ankande të ndryshme dhe të mbivendosura, Platforma e Alokimit do marrë në konsideratë të gjitha detyrimet maksimale të llogaritura të pagesës si detyrime të pagesave të papaguara sipas Nenit 21.
5. Për llogaritjen e detyrimeve maksimale të pagesës në lidhje me kufirin e një zone të ofertimit dhe drejtimin, Platforma e Alokimit do të rendit ofertat e regjistruara të një Pjesëmarrësi të Regjistruar sipas çmimit të ofertës sipas rendit zbritës (renditja sipas meritës). Oferta 1 do të jetë oferta me çmimin e ofertës më të lartë dhe oferta n do të jetë oferta me çmimin e ofertës më të ulët. Platforma e Alokimit do të llogarisë detyrimet maksimale të pagesës sipas ekuacionit të mëposhtëm:

$$MPO = \sum_{hours} MAX \left[BidPrice(1) * BidQuantity(1); BidPrice(2) * \sum_{i=1}^2 BidQuantity(i); \dots \dots; BidPrice(n-1) * \sum_{i=1}^{n-1} BidQuantity(i); BidPrice(n) * \sum_{i=1}^n BidQuantity(i) \right]$$

6. Gjatë llogaritjes së detyrimeve maksimale të pagesës sipas paragrafit 5 të këtij neni, Platforma e Alokimit merr parasysh edhe rritjen e detyrimeve maksimale të pagesës me taksat dhe ngarkesat e aplikueshme në fuqi, sipas Nenit 48.

Neni 33

Përcaktimi i rezultateve të Ankandit

1. Pas skadimit të periudhës së ofertimit për një ankand dhe verifikimit të limitit të kredisë në bazë të Nenit 32, Platforma e Alokimit përcakton rezultatet e ankandit dhe alokon të drejtat ditore të transmisionit në përputhje me këtë nen.
2. Përcaktimi i rezultateve të Ankandit përfshin si në vijim:
 - (a) përcaktimi i sasisë së përgjithshme të të Drejtave Ditore të Transmisionit të alokuara për kufi të Zonës së Ofertimit dhe drejtim;
 - (b) identifikimi i ofertave fituese për t'u përmbushur plotësisht ose pjesërisht; dhe
 - (c) përcaktimi i çmimit marginal për kufi të Zonës së Ofertimit dhe drejtim .
3. Platforma e Alokimit përcakton rezultatet e Ankandit duke përdorur një funksion optimalizimi që synon maksimizimin e shumës së tepicës së pjesëmarrësve të regjistruar dhe të ardhurës së kongjestionit të gjeneruar nga ofertat fituese duke respektuar kufizimet e funksionit të optimalizimit në formën e kapaciteteve të ofertuara përkatëse. Platforma e alokimit publikon informacione shtesë shpjeguese mbi funksionin e optimalizimit të algoritmit në faqen e saj të internetit.
4. Platforma e Alokimit përcakton çmimin marginal në secilin kufi të zonës ofertuese dhe drejtim bazuar në kriteret e mëposhtme:
 - (a) nëse sasia totale e Kapacitetit Ndërzonal, për të cilin janë dorëzuar ofertat e vlefshme, është më e ulët ose e barabartë me kapacitetin përkatës të ofruar për ankandin përkatës, atëherë çmimi marginal do të jetë zero;
 - (b) nëse sasia totale e Kapacitetit Ndërzonal, për të cilin janë dorëzuar ofertat e vlefshme, tejkalon kapacitetin përkatës të ofruar për ankandin përkatës, çmimi marginal do të vendoset në çmimin(-et) e ofertës(-ave) më të ulët të alokuar plotësisht ose pjesërisht, duke përdorur kapacitetet përkatëse të ofruara.
5. Nëse dy (2) ose më shumë Pjesëmarrës të Regjistruar kanë dorëzuar për një kufi të Zonës së Ofertimit dhe drejtim oferta të vlefshme, me të njëjtin çmim të ofertës, të cilat nuk mund të pranohen plotësisht për sasinë totale të kërkuar të të Drejtave Ditore të Transmisionit, atëherë Platforma e Alokimit përcakton ofertat fituese dhe sasinë e të Drejtave Ditore të Transmisionit të alokuara për Pjesëmarrës të Regjistruar si në vijim:
 - (a) Kapaciteti Ndërzonal i disponueshëm për ofertat që përcakton çmimin marginal, ndahet në mënyrë të barabartë midis numrit të Pjesëmarrësve të Regjistruar që kanë dorëzuar këto oferta;
 - (b) në rast se sasia e të Drejtave Ditore të Transmisionit e kërkuar nga një Pjesëmarrës i Regjistruar me çmim marginal është më e ulët ose e barabartë me pjesën e llogaritur sipas pikës (a) më sipër, kërkesa e këtij Pjesëmarrësi të Regjistruar do të përmbushet plotësisht.;
 - (c) në rast se sasia e kërkuar e të Drejtave Ditore të Transmisionit nga një Pjesëmarrës i Regjistruar me Çmim Margjinal tejkalon pjesën e llogaritur sipas pikës (a) më sipër, kërkesa e këtij Pjesëmarrësi të Regjistruar përmbushet deri në shumën e përqindjes së llogaritur sipas në pikën (a) më sipër;
 - (d) çdo Kapacitet Ndërzonal i mbetur pas alokimit sipas pikave (b) dhe (c) pjesëtohet me numrin e Pjesëmarrësve të Regjistruar, kërkesat e të cilëve nuk janë përmbushur

plotësisht dhe u alokohet atyre duke aplikuar procesin e përshkruar në pikat (a), (b) dhe (c) më sipër;

(e) çdo Kapacitet Ndërzonal i mbetur pas alokimit sipas pikës (d) alokohet duke përdorur kriteret e paraqitjes kronologjike (vula kohore).

6. Sa herë që llogaritja e përcaktuar në paragrafët 3 deri në 5 të këtij neni nuk rezulton në një sasi të plotë të MW, në përputhje me paragrafin 1(f) të nenit 28, të drejtat Ditore të Transmisionit rrumbullakohen në vlerën e plotë të MW më të afërt. Rasti kur të Drejtat Ditore të Transmisionit të alokuara për Pjesëmarrësit individualë të Regjistruar janë të barabarta me zero pas rrumbullakimit nuk do të ndikojë në përcaktimin e çmimit marginal.
7. Të Drejtat Ditore të Transmisionit konsiderohen se i janë alokuar Pjesëmarrësi të Regjistruar që nga momenti kur Pjesëmarrësi i Regjistruar është informuar për rezultatet. Në rast se ankandi nuk është kryer me sukses, zbatohen procedurat rezervë të përcaktuara në KAPITULLIN 6.

Neni 34

Njoftimi i rezultateve të Ankandit

1. Platforma e Alokimit vë në dispozicion në Mjetin e Ankandit rezultatet e përkohshme të Ankandit sa më shpejt të jetë e mundur, por jo më vonë se deri ora 9:40 e mëngjesit.
2. Publikimi i rezultateve të ankandit për secilin kufi të Zonës së Ofertimit dhe orë të ditës të përfshira në ankand duhet të përmbajë së paku të dhënat e mëposhtme:
 - (a) të Drejtat totale të kërkuara Ditore të Transmisionit në MW;
 - (b) të Drejtat totale të alokuara Ditore të Transmisionit në MW;
 - (c) Çmimin Margjinal në Euro/MW/orë;
 - (d) numrin e Pjesëmarrësve të Regjistruar që marrin pjesë në Ankand;
 - (e) listën e emrave dhe numrin e Pjesëmarrësve të Regjistruar që kanë vendosur të paktën një ofertë fituese në ankand;
 - (f) listën e ofertave të regjistruara pa identifikimin e Pjesëmarrësve të Regjistruar (Iakorja e ofertës); dhe
 - (g) Të ardhurat e kongestionit për zonë të ofertimit.
3. Jo më vonë se 30 minuta pas publikimit të rezultateve të Ankandit, Platforma e Alokimit nëpërmjet Mjetit të Ankandit i vë në dispozicion të çdo Pjesëmarrësi të Regjistruar që ka dorëzuar ofertë në një ankand specifik për secilin kufi të Zonës së Ofertimit të përfshirë në ankand, së paku të dhënat e mëposhtme:
 - (a) të Drejtat Ditore të Transmisionit të alokuara për çdo orë të Periudhës së Produktit në MW;
 - (b) Çmimin Margjinal në Euro/MW/orë; dhe
 - (c) shumën e duhur për të Drejtat Ditore të alokuara të Transmisionit në Euro (€), e rrumbullakuar në dy presje dhjetore; dhe
 - (d) CAI i caktuar për të Drejtat Ditore të Transmisionit të alokuara.
4. Në rast se Mjeti i Ankandit nuk është i disponueshëm, Platforma e Alokimit informon

Pjesëmarrësit e Regjistruar për rezultatet e ankandit në përputhje me KAPITULLIN 6.

5. Pjesëmarrësit e Regjistruar kontrollojnë rezultatet e ankandit dhe, kur është e arsyeshme, mund të kundërshtojnë rezultatet e ankandit brenda periudhës së kontestimit të përcaktuar në paragrafin 6 të këtij neni. Platforma e Alokimit merr në konsideratë kontestimin e tillë vetëm nëse Pjesëmarrësi i Regjistruar është në gjendje të demonstrojë gabimin e bërë nga Platforma e Alokimit në rezultatet e Ankandit.
6. Pjesëmarrësi i Regjistruar mund të kundërshtojë rezultatet e ankandit brenda afatit të përcaktuar në Specifikimin përkatës të Ankandit.
7. Kontestimi i komunikohet Platformës së Alokimit dhe titullohet si “kontestim”.
8. Çdo kontestim duhet të përmbajë si në vijim:
 - (a) Datën e kontestimit;
 - (b) Identifikimin e Ankandit të kontestuar;
 - (c) Identifikimin e Pjesëmarrësit të Regjistruar;
 - (d) Emrin, adresën elektronike dhe numrin e telefonit të Pjesëmarrësit të Regjistruar;
 - (e) Përshkrimin e detajuar të fakteve dhe arsytet e kontestimit; dhe
 - (f) Dëshminë e rezultateve të gabuara të Ankandit;
9. Platforma e Alokimit ia komunikon Pjesëmarrësit të Regjistruar vendimin e saj për kontestimin jo më vonë se një (1) orë pasi rezultatet e përkohshme të ankandit t'i jenë njoftuar Pjesëmarrësit të Regjistruar.
10. Nëse nuk pranohet asnjë kontestim brenda afatit të përcaktuar në Specifikimin përkatës të Ankandit, rezultatet e përkohshme të Ankandit publikohen si përfundimtare dhe do të jenë të disponueshme në faqen e internetit të Platformës së Ankandit.

KAPITULLI 5

Ushtrimi i të Drejtave ditore të transmisionit

Neni 35

Parimet e përgjithshme

1. Të Drejtat Fizike të Transmisionit, të alokuara në Ankand, i nënshtrohen parimit “përdore ose humbe”.
2. Bartësi i të Drejtave fizike të transmisionit mund të nominojë të Drejtat Fizike të Transmisionit për përdorim fizik në përputhje me nenin 36.
3. Në rast se bartësi i të Drejtave ditore të transmisionit i gëzon të Drejtat Fizike të Transmisionit për shërbimet balancuese, Kapaciteti i tillë Ndërzonal përjashtohet nga zbatimi i parimit “përdore ose humbe”.

Neni 36

Nominimi i të Drejtave fizike të transmisionit

1. Personat që kanë të drejtë të nominojnë të Drejtat Fizike të Transmisionit i përmbushin kërkesat e përshkuara në Rregullat e Nominimit në fuqi. Personat që kanë të drejtë mund të jenë si më poshtë:
 - (a) bartësi i të Drejtave fizike të transmisionit;
 - (b) personi i njoftuar nga bartësi i të Drejtave fizike të transmisionit gjatë procesit të Nominimit tek operatorët përkatës të sistemit të Transmisionit në përputhje me Rregullat përkatëse të Nominimit;
2. Platforma e Alokimit ofron në faqen e saj të internetit një përmbledhje të opsioneve të renditura në paragrafin 1 të këtij neni, të cilat aplikohen në çdo kufi të Zonës Ofertuese.
3. Nominimi bëhet në përputhje me Dokumentin e të Drejtave.
4. Platforma e Alokimit publikon një listë me Rregullat përkatëse të Nominimit për kufijtë e Zonës Ofertuese në faqen e saj të internetit.
5. Afatet e nominimit për kufijtë përkatës të Zonës Ofertuese përcaktohen në Rregullat përkatëse të Nominimit. Platforma e Alokimit publikon informacion në faqen e saj të internetit mbi afatet e Nominimit për kufirin e Zonës Ofertuese. Në rast të ndonjë mospërputhjeje ndërmjet afateve të publikuara nga Platforma e Alokimit dhe atyre të Rregullave të vlefshme dhe ligjërish të detyrueshme përkatëse të Nominimit, këto të fundit mbizotërojnë dhe Platforma e Alokimit nuk mbahet përgjegjëse për asnjë dëmtim për shkak të një mospërputhjeje të tillë.

Neni 37

Dokumenti i të Drejtave

1. Dokumenti i të Drejtave përmban informacionin në lidhje me vëllimin në MW që personat e kualifikuar kanë të drejtë të nominojnë në kufijtë specifik të Zonës Ofertuese dhe drejtimet dhe për periudha në orë.

2. Platforma e Alokimit e dërgon Dokumentin e të Drejtave çdo ditë dhe jo më vonë se tridhjetë (30) minuta pasi rezultatet e Ankandit i janë njoftuar Pjesëmarrësit të Regjistruar te personi i kualifikuar sipas nenit 36 paragrafi 1 (a).

Neni 38

Rezervimi i të Drejtave fizike të transmisionit për shërbimet balancuese

Në përputhje me legjislacionin kombëtar në fuqi, Operatorit të Sistemit të Transmisionit mund t'i kërkohet të ofrojë shërbime balancuese, në të cilin rast ai mund të njoftojë Platformën e Alokimit për rregullat e tij për balancim. Nëse dhe në masën që Operatori i Sistemit të Transmisionit ofron shërbime balancuese në përputhje me legjislacionin kombëtar në fuqi, rregullat e tilla për balancimin bëhen dhe janë pjesë e Rregullave të Alokimit, të zbatueshme në kufirin përkatës të Zonës Ofertuese.

KAPITULLI 6

Procedurat alternative/rezervë

Neni 39

Dispozitat e përgjithshme

1. Platforma e Alokimit organizon, për aq sa arsyeshëm praktike, procedurën rezervë në rastet e mëposhtme të dështimit të një procesi standard:
 - (a) nëse teknikisht nuk është e mundur të mbahet një Ankand, për shembull në rastet e mëposhtme:
 - nëse teknikisht nuk është e mundur të përdoret procedura standarde e shkëmbimit të të dhënave; apo
 - në rast se Platforma e Alokimit përballet me pengesa teknike gjatë procesit të Ankandit; apo
 - (b) në rast të rezultateve të gabuara për shkak të llogaritjes së gabuar të Çmimit Margjinal; apo
 - (c) në rast të alokimit të gabuar të të Drejtave ditore të transmisionit për Pjesëmarrësit e Regjistruar ose arsye të ngjashme.
2. Në Platformën e Alokimit mund të përdoret njëra ose të gjitha procedurat e mëposhtme alternative/rezervë:
 - (a) fillimi i zbatimit të procedurës alternative/rezervë për shkëmbimin e të dhënave sipas nenit 40;
 - (b) shtyrja e fillimit të Periudhës Ofertuese të Ankandit për një kohë të mëvonshme, por jo më vonë se ora 10:30;
 - (c) fillimi i zbatimit të Ankandit Alternativ/Rezervë sipas nenit 42;
 - (d) një tjetër procedurë shtesë ad hoc nëse konsiderohet e përshtatshme nga Platforma e Alokimit për të kapërcyer pengesat teknike.
3. Platforma e Alokimit, për aq sa është e mundur dhe pa vonesa të panevojshme, i informon Pjesëmarrësit e Regjistruar për devijimet e mundshme nga proceset standarde dhe aplikimin e një procedure alternative/rezervë nëpërmjet mjeteve elektronike, siç specifikohet nga Platforma e Alokimit në faqen e saj të internetit dhe duke përdorur Mjetin e Ankandit.
4. Pjesëmarrësit e Regjistruar e informojnë menjëherë Platformën e Alokimit për çdo problem të vërejtur me përdorimin e Mjetit të Ankandit dhe të gjitha pasojat e mundshme nëpërmjet mjeteve elektronike, siç specifikohet nga Platforma e Alokimit në faqen e saj të internetit. Në rast të një problemi urgjent, i cili zgjidhet menjëherë dhe i cili identifikohet gjatë orarit të punës, Pjesëmarrësi i Regjistruar e kontakton menjëherë Platformën e Alokimit me telefon në numrin e telefonit të treguar në faqen e internetit të Platformës së Alokimit për këtë lloj problemi. Platforma e Alokimit e konfirmon marrjen e problemit dhe i informon Pjesëmarrësit e Regjistruar për statusin e problemit sa më shpejt të jetë e mundur.

Neni 40

Procedura alternative/rezervë për shkëmbimin e të dhënave

1. Në rast të dështimit në vendin e Platformës së Alokimit të proceseve standarde për shkëmbimin e të dhënave nëpërmjet Mjetit të Ankandit siç përshkruhet në këto Rregulla të Alokimit, Platforma e Alokimit mund t'i informojë Pjesëmarrësit e Regjistruar se procedura alternative/rezervë për shkëmbimin e të dhënave mund të përdoret si më poshtë:
 - (a) deri në afatet e zbatueshme, përveç nëse shpallet ndryshe nga Platforma e Alokimit, Pjesëmarrësi i Regjistruar kërkon nëpërmjet mjeteve elektronike, siç specifikohet nga Platforma e Alokimit në faqen e saj të internetit, futjen e të dhënave përkatëse në Mjetin e Ankandit duke përdorur këtë procedurë rezervë për shkëmbimin e të dhënave;
 - (b) me kërkesë, Pjesëmarrësi i Regjistruar i ofron Platformës së Alokimit në formatin e specifikuar në Rregullat e Sistemit Informativ të dhënat përkatëse që do të futen në Mjetin e Ankandit;
 - (c) Platforma e Alokimit i vendosë të dhënat e paraqitura në Mjetin e Ankandit;
 - (d) Platforma e Alokimit mund të vendosë në Rregullat e Sistemit Informativ një proces identifikimi për Pjesëmarrësin e Regjistruar në momentin kur Pjesëmarrësi i Regjistruar dorëzon të dhënat përkatëse operationale ose komerciale dhe i kërkon Platformës së Alokimit që t'i fusë këto të dhëna në Mjetin e Ankandit në emër të saj me anë të procedurës ezervë. Nëse Pjesëmarrësi i Regjistruar ose personi i autorizuar nga Pjesëmarrësi i Regjistruar për këtë qëllim nuk identifikohet qartë, Platforma e Alokimit ka të drejtë të mos kryejë futjen e të dhënave;
 - (e) Pjesëmarrësi i Regjistruar i ofron Platformës së Alokimit një numër telefoni, i cili mund të përdoret në rast të një komunikimi të nevojshëm;
 - (f) pasi Platforma e Alokimit të ketë futur të dhënat e ofruara në Mjetin e Ankandit në emër të Pjesëmarrësit të Regjistruar, Platforma e Alokimit e informon, pa vonesë të panevojshme, Pjesëmarrësin e Regjistruar me telefon dhe/ose nëpërmjet mjeteve elektronike siç specifikohet nga Platforma e Alokimit në faqen e saj të internetit për futjen e të dhënave; dhe
 - (g) Platforma e Alokimit në asnjë rrethanë nuk mban përgjegjësi nëse nuk arrin të kontaktojë Pjesëmarrësin e Regjistruar përmes mjeteve të mësipërme të komunikimit.
2. Në rast të aplikimit të procedurës rezervë për shkëmbimin e të dhënave, i gjithë informacioni i nevojshëm që vihet në dispozicion nëpërmjet Mjetit të Ankandit gjatë proceseve standarde mund t'u shpërndahet Pjesëmarrësve të Regjistruar nëpërmjet mjeteve elektronike, siç specifikohet nga Platforma e Alokimit, ose kur është e përshtatshme, të publikuar në faqen e internetit të Platformës së Alokimit.

Neni 41

Procedura rezervë për Ankandin

1. Shtyrja e Ankandit është procedura e paracaktuar rezervë për Ankandet përpara se të hapet Periudha Ofertuese. Platforma e Alokimit mund të shtyjë një Ankand duke njoftuar pjesëmarrësit e regjistruar për kohën e rishikuar të Ankandit të ri.
2. Pasi të jetë hapur Periudha Ofertuese, Platforma e Alokimit:
 - (a) kur është praktikisht e arsyeshme, shtynë përfundimin e Periudhës Ofertuese duke i

njoftuar Pjesëmarrësit e Regjistruar për afatet e rishikuara në Specifikimet e Ankandit; apo

(b) anulon Ankandin fillestar sipas nenit 43; dhe organizon një Ankand të ri për të njëjtën Periudhë të Produktit; apo

(c) aplikon Ankandin Alternativ/Rezervë, siç përcaktohet në nenin 42.

3. Nëse procedura rezervë e përshkruar në paragrafin 1 dhe 2 të këtij neni nuk mund të zbatohet për të njëjtën Periudhë të Produktit, Kapacitetet përkatëse Ndërzonale ofrohen në procesin e mëposhëm të Alokimit të Kapacitetit.
4. Platforma e Alokimit i informon të gjithë Pjesëmarrësit e Regjistruar, pa vonesë të panevojshme, për shtyrjen me njoftim të publikuar në Mjetin e Ankandit dhe/ose në faqen e internetit të Platformës së Alokimit dhe/ose me mjete elektronike, siç specifikohet nga Platforma e Alokimit në faqen e saj të internetit.

Neni 42

Ankandi Alternativ/Rezervë

1. Nëse Platforma e Alokimit, pas publikimit të Specifikimeve të Ankandit, nuk është në gjendje të mbajë Proceset e Ankandit për arsytet e renditura në nenin 39, paragrafi 1, Platforma e Alokimit u dërgon Njoftimin të gjithë Pjesëmarrësve të Regjistruar për aplikimin e Ankandit Alternativ/Rezervë, sa më shpejt të jetë e mundur dhe jo më vonë se ora 10:15 në ditën që i paraprin ditës së dorëzimit.
2. Në rast të Ankandit Alternativ/Rezervë, në Procesin ditor të Ankandit merren parasysh vetëm Ofertat e Paracaktuara për Ankand Alternativ/Rezervë, në përputhje me nenin 31. Nëse Sasia e Ofertës së paracaktuar ose një sasi e llogaritur si shuma e Sasive të Ofertës për disa Oferta të paracaktuara të paraqitura për të njëjtin Ankand nga Pjesëmarrësi i Regjistruar tejkalon kapacitetin përfundimtar të ofruar, Sasia e Ofertës zvogëlohet për të qenë e barabartë me kapacitetin e ofruar.
3. Kapaciteti i Ofruar ndahet në pjesë proporcionale ndërmjet Pjesëmarrësve të Regjistruar.
4. Çmimi marginal i të Drejtave ditore të transmisionit është 0 €/MWh. Vlera e të Drejtave ditore të transmisionit rrumbullakohet në MW të plotë më të afërt.
5. Pjesëmarrësit e Regjistruar informohen për rezultatet deri në orën 10:45, në D-1.

Neni 43

Anulimi i Ankandit

1. Në rast se Platforma e Alokimit anulon një ankand, të gjitha Ofertat e dorëzuara tashmë dhe çdo rezultat i Ankandit përkatës konsiderohen të pavlefshme.
2. Platforma e Alokimit i informon të gjithë Pjesëmarrësit e Regjistruar pa vonesë të panevojshme, për anulimin e Ankandit nëpërmjet njoftimit të publikuar në Mjetin e Ankandit ose në faqen e internetit të Platformës së Alokimit dhe me mjete elektronike, siç specifikohet nga Platforma e Alokimit në faqen e saj të internetit.

3. Anulimi i ankandit mund të shpallet në rastet e mëposhtme:
 - (a) përpara publikimit të rezultateve të përkohshme të Ankandit në rast se Platforma e Alokimit përballlet me pengesa teknike gjatë procesit të Ankandit, si dështimi i proceseve standarde dhe procedurave rezervë ose arsye të ngjashme; dhe
 - (b) pas publikimit të përkohshëm të rezultateve të ankandit, në rast të rezultateve të gabuara për shkak të llogaritjes së gabuar të Çmimit Margjinal ose alokimit të gabuar të të Drejtave ditore të transmisionit të Pjesëmarrësit e Regjistruar ose arsye të ngjashme.
4. Në rast të anulimit të Ankandit përpara publikimit të rezultateve përfundimtare të Ankandit, Pjesëmarrësve të Regjistruar nuk u paguhet asnjë kompensim.
5. Platforma e Alokimit publikon në faqen e saj të internetit, pa vonesa të panevojshme, arsyet e anulimit të Ankandit.
6. Dispozitat e këtij neni 43 mund të zbatohen edhe për një Ankand Alternativ/Rezervë (në rast të rezultateve të gabuara).

KAPITULLI 7

Shkurtimi

Neni 44

Ngjarjet nxitëse dhe pasojat e shkurtimit/kufizimit të të Drejtave ditore të transmisionit

1. Të Drejtat ditore të transmisionit mund të shkurtohen/kufizohen vetëm në rast të Forcës Madhore ose situatës emergjente.
2. Shkurtimi mund të zbatohet për të Drejtat e caktuara ditore të transmisionit, duke përfshirë, sipas rastit, për të Drejtat e nominuara Fizike të Transmisionit.
3. Çdo Pjesëmarrës i Regjistruar i prekur nga shkurtimi e humb të drejtën e tij për të nominuar për përdorim fizik të Drejtat përkatëse fizike të Transmisionit nëse kjo e drejtë ekziston në momentin e shkurtimit.
4. Në rastin e shkurtimit, Pjesëmarrësi i Regjistruar i prekur nuk ka të drejtë të marrë ndonjë rimbursim ose kompensim në lidhje me këtë ose si pasojë e kësaj.

Neni 45

Procesi dhe njoftimi për shkurtimin

Në të gjitha rastet, shkurtimi bëhet nga një ose më shumë Operatorë të Sistemit të Transmisionit në kufirin e Zonës Ofertuese ku janë alokuar të Drejtat ditore të transmisionit.

KAPITULLI 8

Faturimi dhe pagesa

Neni 46

Parimet e përgjithshme

1. Pjesëmarrësi i Regjistruar i paguan shumat e detyruara, siç janë llogaritur në përputhje me nenin 47 për të gjitha të Drejtat ditore të transmisionit që i janë alokuar.
2. Pjesëmarrësi i Regjistruar, pas pagesës, mund të përdorë Kapacitetin Ndërzonal të lidhur me të Drejtat ditore të transmisionit të alokuara, vetë siç përshkruhet në këto Rregulla të Alokimit. Çdo e drejtë për përdorim fizik të sistemit të transmisionit mund t'i nënshtrohet marrëveshjeve të veçanta ndërmjet Pjesëmarrësit të Regjistruar dhe Operatorëve përkatës të Sistemit të Transmisionit.
3. Të gjitha informacionet financiare, çmimet dhe shumat e detyruara shprehen në euro (€), përveç nëse devijimet kërkohen me ligjin ose rregulloret në fuqi.
4. Pagesa shlyhet në datën në të cilën shuma e dhënë është kredituar në llogarinë e përfituesit. Çdo interes për pagesë të vonuar konsiderohet si i shlyer në datën kur pagesa është kredituar nga llogaria e paguesit.
5. Pagesat bëhen në euro (€).
6. Platforma e Alokimit merr në konsideratë taksat dhe ngarkesat në normën dhe në masën e zbatueshme kur vlerëson obligimet për pagesa dhe lëshon faturat sipas këtyre Rregullave të Alokimit që i nënshtrohen nenit 48.
7. Pjesëmarrësi i Regjistruar i ofron Platformës së Alokimit informacionin përkatës për të arsyetuar nëse taksat dhe ngarkesat përkatëse janë ose jo të zbatueshme gjatë nënshkrimit të Marrëveshjes së Pjesëmarrjes, si dhe çdo ndryshim në këtë drejtim pa vonesa të panevojshme. Prandaj, Pjesëmarrësi i Regjistruar obligohet të informojë Platformën e Alokimit për çdo taksë dhe ngarkesë lokale, brenda komunitetit ose jashtë komunitetit që është në përputhje me legjislacionin e vendit të themelimit të Pjesëmarrësit të Regjistruar.

Neni 47

Llogaritja e shumave të detyruara

1. Pjesëmarrësit e Regjistruar paguajnë për secilën nga të Drejtat ditore të transmisionit që u alokohen atyre dhe për orë individuale një shumë të barabartë me:
 - (a) Çmimin Margjinal (për MW për orë); shumëzuar me
 - (b) të Drejtat ditore të transmisionit në MW të alokuara në orë individuale të ditës.
2. Të Drejtat ditore të transmisionit faturohen në baza mujore. Platforma e Alokimit llogaritë shumën që duhet të paguhet në mënyrë retroaktive për muajin paraardhës. Shuma e detyruar plus çdo taksë dhe ngarkesë, detyrime ose tarifa të tjera të zbatueshme që i nënshtrohen nenit 48, rrumbullakohen në dy presje dhjetore.

Neni 48

Rritja e shumës për të fituar shumën bruto për qëllime tatimi

1. Çdo Pjesëmarrës i Regjistruar duhet t'i bëjë të gjitha pagesat në lidhje me Rregullat e Alokimit pa ndonjë zbritje tatimore, përveç nëse zbritja tatimore kërkohet me ligj.
2. Nëse me ligj kërkohet që zbritja tatimore të bëhet nga një Pjesëmarrës i Regjistruar, shuma e pagesës së detyruar nga Pjesëmarrësi i Regjistruar për Platformën e Alokimit rritet në një shumë e cila (pas kryerjes së zbritjes tatimore) e lë një shumë të barabartë me shumën e pagesës e cila do të ishte e detyruar nëse nuk do të kërkohet zbritja tatimore.
3. Paragrafi 2 i këtij neni nuk zbatohet në lidhje me ndonjë tatim të vlerësuar në Platformën e Alokimit për çdo pagesë të pranuar në lidhje me Rregullat e Alokimit sipas ligjeve të juridiksionit në të cilin është themeluar Platforma e Alokimit ose, nëse është e ndryshme, juridiksionit (ose juridiksioneve) në të cilat Platforma e Alokimit trajtohet si rezidente për qëllime tatimore ose ka apo konsiderohet të ketë për qëllime tatimore një seli të përhershme ose një vend fiks biznesi të cilit i atribuohet çdo pagesë sipas Rregullave të Alokimit. Paragrafi 2 i këtij neni nuk zbatohet për tatimin mbi vlerën e shtuar (siç parashikohet në Direktivën 2006/112/EC për TVSH-në ose, sipas rastit, çdo legjislacioni i ngjashëm kombëtar, i ndryshuar herë pas here) dhe çdo tatim tjetër të një natyre të ngjashme.

Neni 49

Kushtet e faturimit dhe pagesës

1. Platforma e Alokimit lëshon fatura për pagesa për të gjitha të Drejtat e Transmisionit Ditor në baza mujore dhe jo më vonë se Dita e Dhjetë (10) e Punës e çdo muaji për Ankandet e muajit paraprak.
2. Faturat lëshohen për pagesat e mëposhtme:
 - (a) shumën e detyruar, të përcaktuar në nenin 47(2);
 - (b) çdo tatim dhe ngarkesë relevante që i nënshtrohet nenit 48.
3. Platforma e Alokimit ia dërgon faturën përmes mjeteve elektronike Pjesëmarrësit të Regjistruar, siç specifikohet nga Platforma e Alokimit në faqen e saj të internetit, në email adresën e personit kontaktues financiar të dorëzuar në përputhje me nenin 8 (1)(h) ose duhet ta vërë në dispozicion të Pjesëmarrësit të Regjistruar nëpërmjet Mjetit të Ankandit. Data e lëshimit të faturës është data në të cilën fatura është dërguar me mjete elektronike, siç specifikohet nga Platforma e Alokimit në faqen e saj të internetit, ose data kur fatura vihet në dispozicion nëpërmjet Mjetit të Ankandit nëse kjo bëhet gjatë orarit të punës ose të nesërmen nëse dërgohet pas orarit të punës.
4. Pagesat që duhet të bëhen mund t'i nënshtrohen netimit nga Platforma e Alokimit, duke marrë parasysh shumën e përcaktuar në paragrafin 2 të këtij neni, dhe çdo shumë tjetër të pagueshme nga Platforma e Alokimit për Pjesëmarrësin e Regjistruar, si rezultat i proceseve të alokimit të kryera nga Platforma e Alokimit.
5. Pjesëmarrësi i Regjistruar i shlyen obligimet e pagesës që rrjedhin nga paragrafi 2 ose paragrafi 4 i këtij neni brenda dhjetë (10) ditëve të punës pas datës së lëshimit të faturës.
6. Pagesat nga Pjesëmarrësi i Regjistruar, siç përcaktohet në paragrafin 5 të këtij neni, paguhen në Llogarinë e Biznesit të Platformës së Alokimit të specifikuar në faturë duke treguar referencën e faturës, ose ndryshe, Platforma e Alokimit e mbledhë automatikisht pagesën nga Llogaria e dedikuar e Biznesit të Pjesëmarrësit të Regjistruar në datën përkatëse të faturës.
7. Platforma e Alokimit i shlyen obligimet e saj të pagesave që rrjedhin nga paragrafi 4 i këtij

neni brenda pesëmbëdhjetë (15) ditëve të punës pas datës së pranimit të faturës, përmes pagesës së shumës së detyruar në llogarinë bankare siç është njoftuar gjatë procesit të anëtarësimit në përputhje me nenin 8, paragrafi 1(g) nga Pjesëmarrësi i Regjistruar i cili ka të drejtë për pagesa në datën e caktuar për pagesë.

8. Pas mbledhjes së pagesës siç përcaktohet në paragrafin 6 të këtij neni, Platforma e Alokimit e përditëson Limitin e Kreditit në përputhje me rrethanat.
9. Në rast të një fature të gabuar që rezultojnë në pagesë shtesë të Platformës së Alokimit ose Pjesëmarrësit të Regjistruar, Platforma e Alokimit e korrigjon faturën dhe çdo shumë e detyruar shlyhet sapo t'i jetë njoftuar Pjesëmarrësit të Regjistruar.
10. Të gjitha tarifat bankare mbulohen nga Pjesëmarrësi i Regjistruar.
11. Pjesëmarrësi i Regjistruar nuk ka të drejtë në kompensimin e asnjë shume, ose mbajtjen në burim të ndonjë borxhi që lind në lidhje me obligimet që rrjedhin nga një Ankand, kundrejt ndonjë pretendimi ndaj Platformës së Alokimit, pavarësisht se a rrjedhin apo jo nga një Ankand. Megjithatë, e drejta për kompensim dhe e drejta për mbajtje nuk përjashtohen në rast se pretendimi i Pjesëmarrësit të Regjistruar kundër Platformës së Alokimit përcaktohet me aktgjykim ligjor ose është i pakontestueshëm.

Neni 50

Mosmarrëveshjet rreth pagesave

1. Pjesëmarrësi i Regjistruar mund ta kundërshtojë shumën e një fature, duke përfshirë çdo shumë që duhet t'i kreditohet Pjesëmarrësit të Regjistruar. Në këtë rast, Pjesëmarrësi i Regjistruar bën njoftimin për natyrën e mosmarrëveshjes dhe shumën në mosmarrëveshje në Platformën e Alokimit sa më shpejt të jetë e mundur dhe në çdo rast brenda pesëmbëdhjetë (15) ditëve të punës pas datës së lëshimit të faturës ose fletënotës kreditore me postë rekomande dhe mjete elektronike, siç specifikohet nga Platforma e Alokimit në faqen e saj të internetit. Përtej kësaj periudhe, fatura konsiderohet se është pranuar nga Pjesëmarrësi i Regjistruar.
2. Nëse Pjesëmarrësi i Regjistruar dhe Platforma e Alokimit nuk janë në gjendje ta zgjidhin diferencën brenda dhjetë (10) ditëve të punës pas njoftimit, atëherë zbatohet procedura për zgjidhjen e mosmarrëveshjeve në përputhje me nenin 54.
3. Mosmarrëveshja në lidhje me shumën e një fature në asnjë mënyrë nuk e liron Palën nga obligimi për të paguar këto shuma teksa ato arrijnë për pagesë në përputhje me nenin 49.
4. Nëse është rënë dakord ose përcaktohet bazuar në procedurën e zgjidhjes së mosmarrëveshjeve, siç parashikohet në nenin 54, që një shumë e paguar ose e pranuar nga Pjesëmarrësi i Regjistruar nuk ishte e pagueshme në mënyrë të rregullt, atëherë zbatohet procesi i mëposhtëm:
 - (a) Platforma e Alokimit ia rimbursojë çdo shumë, duke përfshirë interesin që do të llogaritet sipas nenit 46(4) Pjesëmarrësit të Regjistruar në rast se shuma e paguar nga Pjesëmarrësi i Regjistruar, siç përcaktohet në nenin 49(5), ishte më e lartë ose shuma e paguar nga Platforma e Alokimit ishte më e ulët se shuma që duhej të paguhej. Platforma e Alokimit e bënë pagesën në llogarinë bankare të treguar nga Pjesëmarrësi i Regjistruar për këtë rimbursim në përputhje me nenin 8, paragrafi 1(g).
 - (b) Pjesëmarrësi i Regjistruar paguan çdo shumë, duke përfshirë interesin që do të llogaritet sipas nenit 46(4), në Platformën e Alokimit në rast se shuma e paguar nga

Pala e Regjistruar, siç përcaktohet në nenin 49(5), ishte më e ulët ose shuma e paguar nga Platforma e Alokimit ishte më e lartë se shuma që duhej të paguhej. Pjesëmarrësi i Regjistruar e bënë pagesën në përputhje me procedurën e përcaktuar në nenin 49(6). Pas një pagese të tillë, Platforma e Alokimit përditëson Limitin e Kreditit të Pjesëmarrësit të Regjistruar, siç përcaktohet në nenin 49(8).

5. Interesi i paguar, në rast të pagesës në përputhje me paragrafin 4 të këtij neni, aplikohet nga dita e parë (1) pas datës në të cilën pagesa duhej të paguhej deri në datën në të cilën është rimbursuar shuma e kontestuar dhe aplikohet gjithashtu për të gjitha taksat dhe ngarkesat e kërkuara me ligj.

Neni 51

Pagesa e vonuar dhe incidenti i pagesës

1. Në rast se Pjesëmarrësi i Regjistruar nuk e ka paguar plotësisht një faturë deri në datën e specifikuar në faturë, Platforma e Alokimit e njofton Pjesëmarrësin e Regjistruar se një incident pagese do të regjistrohet nëse shuma që përfshin interesin e aplikueshëm nuk merret brenda tre (3) ditëve të punës pas dërgimit të njoftimit. Në rast të mospagesës brenda afatit, Platforma e Alokimit e njofton Pjesëmarrësin e Regjistruar se incidenti i pagesës është regjistruar.
2. Menjëherë pas regjistrimit të incidentit të pagesës, Platforma e Alokimit mund të thirrë kolateralet.
3. Platforma e Alokimit mund të pezullojë ose ndërprejë Marrëveshjen e Pjesëmarrjes në rast të incidentit të regjistruar të pagesës në përputhje me nenet 55 dhe 56.
4. Në rast të pagesës së vonuar ose rimbursimit, Palët paguajnë interes mbi shumën e detyruar, duke përfshirë taksat dhe ngarkesat nga dita e parë (1) pas datës në të cilën pagesa duhej të kryhej deri në datën në të cilën është kryer pagesa. Interesi është i barabartë me cilëndo që është më e larta prej shumave në vijim:
 - (a) një tarifë të sheshtë prej 100 €; ose
 - (b) tetë (8) pikë përqindje në vit mbi normën e interesit të referencës siç publikohet zyrtarisht nga autoritetet kombëtare të vendit në të cilin ndodhet Platforma e Alokimit dhe rrumbullakohet deri në gjysëm pikë përqindjen më të afërt.

KAPITULLI 9

Të ndryshme

Neni 52

Kohëzgjatja dhe ndryshimi i Rregullave të Alokimit

1. Rregullat e Alokimit janë me kohëzgjatje të pacaktuar dhe janë subjekt i ndryshimeve në përputhje me këtë nen. Për këto Rregulla të Alokimit dhe çdo ndryshim të tyre mbahen konsultime në bazë të paragrafit 7 të këtij neni, të propozuara nga Operatorët përkatës të Sistemit të Transmisionit dhe hyjnë në fuqi në përputhje me regjimin rregullator kombëtar në fuqi. Platforma e Alokimit i publikon Rregullat e ndryshuara të Alokimit dhe u dërgon njoftim për ndryshimin pjesëmarrësve të regjistruar.
2. Në varësi të paragrafit 7 të këtij neni, një ndryshim hyn në fuqi në datën dhe kohën e specifikuar në njoftimin e ndryshimit, por jo më herët se tridhjetë (30) ditë kalendarike pas dërgimit të njoftimit të ndryshimit te Pjesëmarrësit e Regjistruar nga Platforma e Alokimit.
3. Çdo ndryshim zbatohet për të gjitha aspektet e këtyre Rregullave të Alokimit, duke përfshirë por pa u kufizuar në të gjitha Ankandet e zhvilluara pas datës në të cilën ndryshimi hyn në fuqi.
4. Përveç nëse nuk përcaktohet ndryshe shprehimisht nga Platforma e Alokimit, Rregullat e ndryshuara të Alokimit rregullojnë të gjitha të drejtat dhe detyrimet në lidhje me këto Rregulla të Alokimit, duke përfshirë ato të fituara para datës së ndryshimit, por me datën e dorëzimit pasi ndryshimi të hyjë në fuqi.
5. Çdo ndryshim i këtyre Rregullave të Alokimit zbatohet automatikisht për Marrëveshjen e Pjesëmarrjes në fuqi midis Platformës së Alokimit dhe Pjesëmarrësit të Regjistruar, pa pasur nevojë që Pjesëmarrësi i Regjistruar të nënshkruajë një Marrëveshje të re të Pjesëmarrjes, por pa cenuar të drejtën e Pjesëmarrësit të Regjistruar për të kërkuar ndërprerjen e Marrëveshjes së tij të Pjesëmarrjes në përputhje me nenin 56 (1). Me pjesëmarrjen në Ankand pasi Pjesëmarrësi i Regjistruar është informuar për ndryshimet dhe/ose përshtatjet e Rregullave të Alokimit dhe pasi këto ndryshime dhe/ose adaptime të Rregullave të Alokimit kanë hyrë në fuqi, konsiderohet se Pjesëmarrësi i Regjistruar ka pranuar versionin e ndryshuar, dmth. versionin e vlefshëm dhe efektiv të Rregullave të Alokimit.
6. Rregullat e Alokimit rishikohen periodikisht nga Platforma e Alokimit, Operatorët përkatës të Sistemit të Transmisionit të paktën çdo dy vjet duke përfshirë Pjesëmarrësit e Regjistruar. Në rast se Operatorët përkatës të Sistemit të Transmisionit konsiderojnë ndryshimin e këtyre Rregullave të Alokimit si rezultat i këtij rishikimi, zbatohet procedura e përshkruar në këtë nen. Ky rishikim dyvjeçar nuk cenon kompetencën e Autoriteteve Rregullatore Kombëtare për të kërkuar në çdo kohë ndryshime të Rregullave të Alokimit dhe shtojcave të përfshira në to në përputhje me legjislacionin ekzistues.
7. Këto Rregulla të Alokimit i nënshtrohen legjislacionit që mbizotëron në kohën kur ato hyjnë në fuqi. Në rast se ka një ndryshim në legjislacion ose ndonjë veprim nga autoritetet kompetente në nivelin kombëtar, ose nivelin e Bashkimit Evropian, ose, sipas rastit, në nivelin e Komunitetit të Energjisë, që kanë një efekt në këto Rregulla të Alokimit dhe/ose anekset e tyre atëherë, pavarësisht nga ndonjë dispozitë tjetër e këtyre Rregullave të Alokimit, Rregullat e Alokimit ndryshohen në përputhje me rrethanat dhe në përputhje me këtë nen.

8. Lista e kufijve të Zonës Ofertuese (Shtojca 1), për të cilat zbatohen Rregullat e Alokimit, mund të ndryshohet ose plotësohet në përputhje me dispozitat në lidhje me ndryshimin e Rregullave të Alokimit, me kusht që për ndryshimin e kësaj liste nevojitet miratimi i një ose më shumë ARK-ve.
9. Me qëllim të inkorporimit të ndryshimit ose plotësimit, vetëm miratimi i një ARK-je që ka juridiksion mbi OST-në përkatëse, kufiri i Zonës Ofertuese të së cilës është ndryshuar ose shtuar, duhet të konsultohet ose t'i kërkohet miratimi, sipas rastit.

Neni 53

Përgjegjësia

1. Platforma e Alokimit dhe Pjesëmarrësit e Regjistruar janë të vetmit përgjegjës për përmbushjen e çdo detyrimi që ata marrin përsipër ose i nënshtrohen dhe që lind nga Rregullat e Alokimit dhe Marrëveshja e Pjesëmarrjes ose që lidhet me të njëjtat.
2. Në varësi të ndonjë dispozite tjetër të këtyre Rregullave të Alokimit, Platforma e Alokimit është përgjegjëse vetëm për dëmet e shkaktuara nga:
 - (a) mashtrimi, neglizhenca e rëndë ose sjellja e gabuar me dashje.
 - (b) vdekja ose lëndimi personal që lind nga neglizhenca e saj ose e punonjësve të saj, agjentëve ose nënkontraktorëve.
3. Një Pjesëmarrës i Regjistruar dëmshpërblen dhe mban të dëmshpërblyer Platformën e Alokimit dhe zyrtarët e saj, punonjësit dhe agjentët për dhe kundër çdo humbjeje ose përgjegjësie (përfshirë kostot ligjore) në lidhje me një dëm që ai ka shkaktuar, të cilin cilido prej tyre mund të pësojë ose shkaktojë për shkak të ndonjë pretendimi nga ndonjë palë e tretë për shkak të ndonjë humbjeje (qoftë direkte apo indirekte) të pësuar nga pretenduesi ose ndonjë nga zyrtarët, agjentët, nënkontraktorët ose punonjësit e pretenduesit në lidhje me këto Rregulla të Alokimit.
4. Platforma e Alokimit dhe secili Pjesëmarrës i Regjistruar pranon dhe bie dakord që mban përfitimin e paragrafit 3 të këtij neni për vete dhe si administrues i besuar dhe agjent për zyrtarët, punonjësit dhe agjentët e saj.
5. Pjesëmarrësi i Regjistruar është i vetmi përgjegjës për pjesëmarrjen e tij në Ankande, duke përfshirë por pa u kufizuar në rastet vijuese:
 - (a) arritja në kohë e Ofertave dhe njoftimeve të transferimit dhe kthimit nga Pjesëmarrësi i Regjistruar;
 - (b) dështimi teknik i sistemit të informacionit në anën e Pjesëmarrësit të Regjistruar që pengon komunikimin përmes kanaleve të parashikuara në përputhje me këto Rregulla të Alokimit.
6. Pjesëmarrësi i Regjistruar është përgjegjës për sa i përket sanksioneve, gjobave ose ngarkesave që mund të vendosen nga autoritetet financiare për Platformën e Alokimit për trajtim të pasaktë tatimor për shkak të informacionit të gabuar ose jo të plotë të dhënë nga Pjesëmarrësi i Regjistruar.
7. Ky nen vazhdon të jetë në fuqi edhe pas ndërprerjes së Marrëveshjes së Pjesëmarrjes të Pjesëmarrësit të Regjistruar.

Neni 54

Zgjidhja e mosmarrëveshjeve

1. Pa cenuar paragrafët 6 dhe 8 të këtij neni, kur ka një mosmarrëveshje, Platforma e Alokimit dhe Pjesëmarrësi i Regjistruar së pari do të kërkojnë zgjidhje miqësore përmes konsultimit të ndërsjellë në përputhje me paragrafin 2. Për këtë qëllim, Pala e cila ngre mosmarrëveshjen do t'i dërgojë një njoftim palës tjetër duke treguar:
 - (a) ekzistencën e një Marrëveshjeje Pjesëmarrjeje ndërmjet palëve;
 - (b) arsyen e mosmarrëveshjes; dhe
 - (c) një propozim për një takim të ardhshëm, fizik ose jo, me synimin për të zgjidhur mosmarrëveshjen në mënyrë miqësore.
2. Palët do të takohen brenda njëzet (20) ditësh pune pasi çështja u është referuar atyre dhe kërkojnë zgjidhjen e mosmarrëveshjes. Nëse nuk arrihet marrëveshje ose nuk merret asnjë përgjigje brenda një periudhe prej tridhjetë (30) ditësh pune nga data e njoftimit të lartpërmendur, secila palë mund t'ia referojë çështjen menaxhmentit të lartë të Palëve për të zgjidhur mosmarrëveshjen në përputhje me paragrafin 3.
3. Përfaqësuesi i lartë i secilit prej të dyve, Platformës së Alokimit dhe Pjesëmarrësit të Regjistruar, me autorizim për të zgjidhur mosmarrëveshjen, takohen brenda njëzet (20) ditëve të punës nga kërkesa për takim dhe përpiqen të zgjidhin mosmarrëveshjen. Nëse përfaqësuesit nuk janë në gjendje të zgjidhin mosmarrëveshjen brenda njëzet (20) ditëve të punës nga takimi ose një kohe më të gjatë të dakorduar, atëherë mosmarrëveshja vendoset me arbitrazh në përputhje me paragrafin 4.
4. Kur një mosmarrëveshje do t'i referohet arbitrazhit sipas paragrafit 3, qoftë Platforma e Alokimit ose Pjesëmarrësi i Regjistruar mund t'i japin njoftim tjetrit duke cekur natyrën e mosmarrëveshjes dhe duke ia referuar mosmarrëveshjen arbitrazhit. Arbitrazhi kryhet në përputhje me Rregullat e Arbitrazhit të Odës së Tregtisë (ICC). Arbitrazhi zhvillohet përpara një (1) arbitri që do të emërohet me marrëveshjen e Palëve përveç nëse një Palë kërkon emërimin e tre (3) arbitrave. Në rast të një (1) arbitri, Palët bien dakord mbi emërimin e arbitrit brenda dy (2) muajve pas dhënies së njoftimit nga Pala, duke e referuar mosmarrëveshjen në arbitrazh. Nëse nuk mund të gjendet ndonjë marrëveshje, arbitri emërohet nga Gjykata e ICC-së. Në rast të tre (3) arbitrave, paditësi emëron një (1) arbitër dhe i padituri emëron një (1) arbitër. Arbitrat e emëruar nga secila Palë emërojnë kryesuesin e gjykatës së arbitrazhit brenda tre (3) ditëve të punës nga konfirmimi i emërimit të arbitrit të dytë nga i padituri. Nëse arbitrat e emëruar nga secila palë nuk mund të bien dakord për emërimin e kryesuesit, kryesuesi emërohet nga Gjykata e ICC-së. Arbitrazhi zhvillohet në lokacionin e Platformës së Alokimit përveç nëse përcaktohet ndryshe në Marrëveshjen e Pjesëmarrjes dhe në përputhje me ligjin rregullues të këtyre Rregullave të Alokimit ndërsa gjuha e procedurave të arbitrazhit është gjuha angleze. Dispozitat e arbitrit emergjent sipas Rregullave të Arbitrazhit të Dhomës së Tregtisë nuk zbatohen, por zbatohen masat e përkohshme ose të detyrueshme të ndihmës sipas ligjit rregullues.
5. Vendimet e arbitrazhit janë përfundimtare dhe detyruese për Platformën e Alokimit dhe Pjesëmarrësin përkatës të Regjistruar që nga data e marrjes së tyre. Platforma e Alokimit dhe Pjesëmarrësi i Regjistruar kryejnë çdo vendim të një arbitrazhi në lidhje me çdo mosmarrëveshje pa vonesë dhe secili heq dorë nga e drejta e tij për çdo formë ankese ose rekursi në një gjykatë ose një autoriteti tjetër gjyqësor, për aq sa heqja dorë e tillë mund të bëhet në mënyrë të vlefshme.
6. Pavarësisht nga paragrafët 3 dhe 4 të këtij neni, Palët mund të bien dakord bashkërisht të zbatojnë procedurat gjyqësore në vend të arbitrazhit për të zgjidhur një mosmarrëveshje që

ka lindur në lidhje me këto Rregulla të Alokimit.

7. Në rastet e pagesës së vonuar dhe pavarësisht nga neni 51 dhe paragrafët 1 deri 4 të këtij neni, një palë mund të fillojë procedime gjyqësore kundër palës tjetër për çdo shumë të detyruar sipas këtyre Rregullave të Alokimit ose në lidhje me to dhe të papaguar për më shumë se njëzet (20) ditë të punës pas datës kur shumat ishin të pagueshme.
8. Palët bien dakord që procedurat e përmendura në paragrafët 6 ose 7 të këtij neni mund të ngriten në çdo gjykatë kompetente për të dëgjuar një pretendim të tillë. Pjesëmarrësi i Regjistruar heq dorë në mënyrë të pakthyeshme nga çdo kundërshtim që mund të ketë tani ose më pas në lidhje me vendin e zhvillimit të procedurave të tilla në ndonjë gjykatë kompetente dhe çdo pretendim se ndonjë procedurë e tillë është ngritur në një forum të papërshtatshëm.
9. Pavarësisht nga çdo referencë ndaj zgjidhjes miqësore, zgjidhje eksperti ose arbitrazhi sipas këtij neni, Platforma e Alokimit dhe Pjesëmarrësi i Regjistruar vazhdojnë të kryejnë detyrimet e tyre përkatëse sipas këtyre Rregullave të Alokimit dhe Marrëveshjes së Pjesëmarrjes së Pjesëmarrësit të Regjistruar.
10. Ky nen mbetet në fuqi edhe pas ndërprerjes së Marrëveshjes së Pjesëmarrjes të Pjesëmarrësit të Regjistruar.

Neni 55

Pezullimi i Marrëveshjes së Pjesëmarrjes

1. Platforma e Alokimit mundet nëpërmjet njoftimit për Pjesëmarrësin e Regjistruar të pezullojë përkohësisht të drejtat e Pjesëmarrësit të Regjistruar në lidhje me këto Rregulla të Alokimit me efekt të menjëhershëm nëse Pjesëmarrësi i Regjistruar kryen një shkelje të rëndë të një detyrimi në lidhje me këto Rregulla të Alokimit që mund të ketë një ndikim të rëndësishëm në Platformën e Alokimit si më poshtë:
 - (a) nëse një Pjesëmarrës i Regjistruar dështon të paguajë ndonjë shumë të papaguar dhe borxh ndaj Platformës së Alokimit në përputhje me nenin 51;
 - (b) nëse një Pjesëmarrës i Regjistruar dështon të sigurojë dhe mirëmbajë kolateralin në përputhje me nenin 23;
 - (c) çdo shkelje që mund të ketë një ndikim të rëndësishëm financiar në Platformën e Alokimit;
 - (d) Platforma e Alokimit ka bazë të arsyeshme për të besuar se Pjesëmarrësi i Regjistruar nuk plotëson më një ose më shumë nga kushtet e tjera për të marrë pjesë në Ankande në përputhje me këto Rregulla të Alokimit përveç nëse ndërprerja zbatohet në përputhje me nenin 56.
 - (e) nëse Pjesëmarrësi i Regjistruar është nën sanksione ekonomike dhe tregtare të cilat mund të kenë një ndikim të rëndësishëm në Platformën e Alokimit
2. Në çdo rast të një shkelje të vogël në lidhje me këto Rregulla të Alokimit të tilla si, por pa u kufizuar në dështimin e Pjesëmarrësit të Regjistruar për të njoftuar një ndryshim në informacionin e paraqitur në përputhje me nenin 8, Platforma e Alokimit mundet me njoftim të Pjesëmarrësit të Regjistruar të informojë pjesëmarrësin e regjistruar se të drejtat e tij në lidhje me këto Rregulla të Alokimit mund të pezullohen përveç nëse pjesëmarrësi i regjistruar

korrigjon ngjarjen e pezullimit në periudhën kohore të specifikuar në njoftim. Pezullimi hyn në fuqi kur periudha e përcaktuar për korrigjim ka skaduar pa u realizuar korrigjimi i tillë. Pasi pezullimi hyn në fuqi në përputhje me paragrafët 1 dhe 2 të këtij neni, Pjesëmarrësi i Regjistruar i pezulluar nuk mund të marrë pjesë më në një Ankand.

3. Platforma e Alokimit mund të tërheqë një njoftim sipas paragrafëve 1 ose 2 të këtij neni në çdo kohë. Pasi të ketë dhënë një njoftim sipas paragrafëve 1 ose 2 të këtij neni, Platforma e Alokimit mund të japë një njoftim të mëtejshëm ose tjetër në çdo kohë në lidhje me të njëjtën ose një ngjarje tjetër pezullimi.
4. Pasi që Pjesëmarrësi i Regjistruar të ketë përmbushur ose korrigjuar ngjarjen e pezullimit siç i është njoftuar në njoftimin e dërguar nga Platforma e Alokimit, Platforma e Alokimit rivendosë sa më shpejt që është arsyeshëm e mundur të drejtat e Pjesëmarrësit të Regjistruar në lidhje me aftësinë e tij për të marrë pjesë në Ankande përmes njoftimit me shkrim për Pjesëmarrësin e Regjistruar. Që nga data e hyrjes në fuqi të rivendosjes, Pjesëmarrësi i Regjistruar mund të marrë pjesë në Ankande.
5. Nëse Platforma e Alokimit njofton një Pjesëmarrës të Regjistruar sipas paragrafit 1 ose 2 të këtij neni, njoftimi i tillë i pezullimit nuk e liron pjesëmarrësin e regjistruar nga detyrimet e tij të pagesës sipas KAPITULLIT 8.

Neni 56

Ndërprerja e Marrëveshjes së Pjesëmarrjes

1. Një Pjesëmarrës i Regjistruar mundet në çdo kohë të kërkojë nga Platforma e Alokimit të ndërprejë Marrëveshjen e Pjesëmarrjes në të cilën Pjesëmarrësi i Regjistruar është Palë. Ndërprerja hyn në fuqi pas tridhjetë (30) ditëve të punës pas marrjes së kërkesës për ndërprerje nga Platforma e Alokimit dhe nëse të gjitha detyrimet e papaguara të pagesës janë shlyer.
2. Një Pjesëmarrës i Regjistruar mund të ndërpresë Marrëveshjen e Pjesëmarrjes në të cilën Pjesëmarrësi i Regjistruar është Palë për arsye të mira kur Platforma e Alokimit ka kryer një shkelje të rëndë të një detyrimi lidhur me këto Rregulla të Alokimit ose Marrëveshjen e Pjesëmarrjes në rastet e mëposhtme:
 - (a) kur Platforma e Alokimit dështon në mënyrë të përsëritur t'i paguajë ndonjë shumë të detyruar dhe borxh Pjesëmarrësit të Regjistruar me një ndikim të konsiderueshëm financiar;
 - (b) kur ka një shkelje të konsiderueshme të detyrimeve të konfidencialitetit në përputhje me nenin 59.

Pjesëmarrësi i Regjistruar i dërgon një njoftim Platformës së Alokimit duke cekur arsyen e ndërprerjes dhe duke i dhënë Platformës së Alokimit njëzet (20) ditë pune për të korrigjuar shkeljen. Në qoftë se Platforma e Alokimit nuk korrigjon shkeljen brenda afatit të lartpërmendur, ndërprerja hyn në fuqi menjëherë pas skadimit të këtij afati.

3. Nëse ndonjë nga ngjarjet e ndërprerjes në paragrafin 4 ndodh në lidhje me një Pjesëmarrës të Regjistruar, Platforma e Alokimit mundet nëpërmjet njoftimit të Pjesëmarrësit të Regjistruar të ndërprejë Marrëveshjen e Pjesëmarrjes, përfshirë të drejtat e Pjesëmarrësit të Regjistruar që lidhen me këto Rregulla të Alokimit. Një ndërprerje sipas këtij paragrafi hyn në fuqi nga koha e njoftimit ose ndonjë kohë tjetër e specifikuar në të. Pjesëmarrësi i Regjistruar nuk mund të hyjë në një fazë të mëvonshme në Marrëveshjen e Pjesëmarrjes me Platformën

e Alokimit derisa rrethanat e ndërprerjes vazhdojnë të ekzistojnë ose nuk është garantuar mjaftueshëm që shkelja nuk mund të ndodhë më.

4. Ngjarjet e ndërprerjes të referuara në paragrafin 3 janë si më poshtë:
 - (a) nëse të drejtat e pjesëmarrësit të regjistruar pezullohen për më shumë se tridhjetë (30) ditë pune;
 - (b) nëse një Pjesëmarrës i Regjistruar nuk kualifikohet për pjesëmarrje në Ankand siç përcaktohet në nenin 9;
 - (c) nëse një Pjesëmarrës i Regjistruar shkel në mënyrë të përsëritur këto Rregulla të Alokimit ose Marrëveshjen e Pjesëmarrjes, qoftë nëse shkelja mund të korrigjohet ose jo;
 - (d) nëse një autoritet kompetent (i) përcakton që Pjesëmarrësi i Regjistruar ka kryer një keqpërdorim ose veprim mashtrues dhe (ii) i kërkon Platformës së Alokimit të ndërprejë Marrëveshjen e Pjesëmarrjes në të cilën ky Pjesëmarrës i Regjistruar është Palë ose (iii) bie dakord që Platforma e Alokimit ka bazë të arsyeshme për të besuar se Pjesëmarrësi i Regjistruar ka kryer një keqpërdorim ose veprim mashtrues në pjesëmarrjen në Ankande; ose
 - (e) nëse Pjesëmarrësi i Regjistruar ka ndërmarrë ndonjë veprim që mund të çojë në dëmtimin ose uljen e efektivitetit të Mjetit të Ankandit (duke nënkuptuar që një veprim i tillë konsiderohet të ketë ndodhur në rast të ndonjë sjellje që mund të shndërrohet në një sulm ndaj sistemit të informacionit siç janë, por pa u kufizuar në, mohimi i shërbimit, spam, virus, forca brutale, sulmi i kalit të Trojës).
5. Pasi ndërprerja të hyjë në fuqi në përputhje me paragrafët 1 deri në 3 të këtij neni dhe nga ajo kohë, Pjesëmarrësi i Regjistruar nuk mund të marrë pjesë më në një Ankand.
6. Ndërprerja e një Marrëveshjeje të Pjesëmarrjes nuk prek asnjë të drejtë dhe detyrim sipas Marrëveshjes së Pjesëmarrjes dhe këtyre Rregullave të Alokimit dhe në lidhje me to, që kanë lindur para kësaj ndërprerje, përveç nëse specifikohet ndryshe në këtë nen. Prandaj, çdo Pjesëmarrës i Regjistruar, Marrëveshja e Pjesëmarrjes e të cilit është ndërprerë, do të mbetet përgjegjës, në varësi dhe në përputhje me Rregullat e Alokimit, në lidhje me të gjitha të drejtat dhe detyrimet e tilla. Ky paragraf zbatohet pa paragjykuar mjetet tjera juridike në dispozicion të Platformës së Alokimit sipas këtyre Rregullave të Alokimit.

Neni 57

Forca Madhore

1. Platforma e Alokimit ose një Pjesëmarrës i Regjistruar, i cili thirret në Forcën Madhore, i dërgon menjëherë Palës tjetër një njoftim që përshkruan natyrën e Forcës Madhore dhe kohëzgjatjen e saj të mundshme dhe vazhdon të sigurojë raporte në lidhje me të me shpeshtësi të arsyeshme gjatë periudhës së Forcës Madhore. Pala që thirret në Forcën Madhore bën çdo përpjekje të mundshme për të kufizuar pasojat e Forcës Madhore.
2. Detyrimet, detyrat dhe të drejtat e palëve të prekura në varësi të Forcës Madhore pezullohen nga fillimi i Forcës Madhore, me përjashtim të dispozitave të konfidencialitetit në përputhje me nenin 59.
3. Pezullimi sipas paragrafit 2 i nënshtrohet sa më poshtë:
 - (a) pezullimi nuk do të ketë fushëveprim më të madh dhe nuk do të zgjasë më shumë

sesa kërkohet nga Forca Madhore;

- (b) pezullimi zbatohet vetëm për aq kohë sa Pala që thirret në Forcën Madhore përdorë përpjekje të arsyeshme për të korrigjuar paaftësinë e tyre për të performuar.
4. Pasojat e një ngjarje të Forcës Madhore, e cila nuk i nënshtrohet ndonjë diskutimi ose procesi gjyqësor midis Platformës së Alokimit dhe Pjesëmarrësit të Regjistruar, janë:
- (a) Pala që thirret në Forcën Madhore nuk mund të mbahet përgjegjëse për të paguar kompensimin për ndonjë dëm të pësuar, për shkak të moskryerjes ose kryerjes së pjesshme të të gjitha ose ndonjë prej detyrimeve të saj gjatë Forcës Madhore dhe kur një moskryerje e tillë ose një kryerje e pjesshme i detyrohet drejtpërdrejt Forcës Madhore;
 - (b) të Drejtat e fituara ditore të transmisionit të cilat janë paguar plotësisht dhe i nënshtrohen Forcës Madhore rimburohen për kohëzgjatjen e Forcës Madhore në përputhje me çdo legjislacion të zbatueshëm dhe këto Rregulla të Alokimit; dhe
5. Nëse Forca Madhore vazhdon për një periudhë më të gjatë se gjashtë (6) muaj, Platforma e Alokimit ose secili Pjesëmarrës i Regjistruar mundet, nëpërmjet njoftimit të palës tjetër në çdo kohë gjersa Forca e Madhore vazhdon përtej asaj periudhe, të ndërprejë në mënyrë të njëanshme Marrëveshjen e Pjesëmarrjes. Ndërprerja hyn në fuqi dhjetë (10) ditë pune dhënies së njoftimit ose në ndonjë datë të mëvonshme të specifikuar në njoftim.
6. Për të shmangur dyshimet, ky nen nuk cenon dispozitat e KAPITULLIT 7 në lidhje me shkurtimin e të Drejtave ditore të transmisionit.

Neni 58

Njoftimet

1. Çdo njoftim ose komunikim tjetër që do të jepet sipas këtyre Rregullave të Alokimit ose në lidhje me to është në gjuhën angleze.
2. Përveç nëse parashikohet ndryshe shprehimisht në këto Rregulla të Alokimit, të gjitha njoftimet ose komunikimet e tjera bëhen me shkrim ndërmjet Platformës së Alokimit dhe secilit Pjesëmarrës të Regjistruar dhe dërgohen nëpërmjet mjeteve elektronike siç specifikohet nga Platforma e Alokimit në faqen e saj të internetit dhe shënjuar për vëmendjen e përfaqësuesit të Palës tjetër siç përcaktohet në Marrëveshjen e Pjesëmarrjes ose siç njoftohet nga Pjesëmarrësi i Regjistruar herë pas here në përputhje me nenin 8.
3. Të gjitha njoftimet ose komunikimet e tjera jepen nëpërmjet letrës së dorëzuar me dorë kundrejt fletëpranimit ose të dërguara me postë rekomande ose korrier në rastet e mëposhtme:
 - (a) lidhja e Marrëveshjes së Pjesëmarrjes në përputhje me nenin 6;
 - (b) pezullimi dhe ndërprerja sipas nenit 56 dhe nenit 55; dhe
 - (c) dorëzimi i Garancisë bankare, në rast se Garancia Bankare përfshin nënshkrim(e) me dorë, në përputhje me nenin 19 në përputhje me nenin 19
4. Të gjitha njoftimet ose komunikimet e tjera konsiderohet se janë marrë:
 - (a) në rastin e dorëzimit me dorë, kur dorëzohet kundrejt fletëpranimit; ose

- (b) në rastin e postës së parapaguar të dorëzimit të regjistruar, në ditën që pason ditën e regjistruar të dorëzimit; ose
 - (c) në rastin e mjeteve elektronike siç specifikohet nga Platforma e Alokimit në faqen e saj të internetit, kur i dorëzohen palës tjetër, por vetëm nëse kërkohet dhe merret një konfirmim i marrjes nga pala që dërgon mjetet elektronike siç specifikohet nga Platforma e Alokimit në faqen e saj të internetit.
5. Nëse një njoftim ose komunikim tjetër është marrë jashtë orarit normal të punës në një ditë pune, konsiderohet se është marrë me fillimin e punës në ditën tjetër të punës.

Neni 59

Konfidencialiteti

1. Marrëveshja e Pjesëmarrjes dhe çdo informacion tjetër i shkëmbyer në lidhje me përgatitjen e saj dhe aplikimi nga një pjesëmarrës në treg do të konsiderohen si konfidenciale.
2. Në varësi të paragrafit 3 të këtij neni, Platforma e Alokimit dhe secili Pjesëmarrës i Regjistruar, i cili është marrës i informacionit konfidencial në lidhje me këto Rregulla të Alokimit ruan konfidencialitetin e këtij informacioni dhe nuk e zbulon, raporton, publikon, shpalosë, transferon ose përdorë direkt ose indirekt, ndonjë pjesë të informacionit konfidencial ndryshe nga qëllimi për të cilin është shpalosur.
3. Pavarësisht nga paragrafi 2 i këtij neni, Platforma e Alokimit ose një Pjesëmarrës i Regjistruar mund të zbulojë informacione konfidenciale të një Pale zbuluese tek një palë e tretë me pëlqimin paraprak të Palës tjetër të shprehur me shkrim dhe me kusht që Pala marrëse të ketë dhënë sigurinë që pala e tretë e tillë është e lidhur me detyrime ekuivalente të konfidencialitetit siç përcaktohet në këto Rregulla të Alokimit të zbatueshme drejtpërdrejt nga Pala tjetër.
4. Pavarësisht nga paragrafi 2 i këtij neni, Platforma e Alokimit ose një Pjesëmarrës i Regjistruar mund të zbulojë informacione konfidenciale të Palës zbuluese:
 - (a) në masën e lejuar ose të parashikuar shprehimisht nga Rregullat e Alokimit;
 - (b) për çdo person që është një nga drejtorët, zyrtarët, punonjësit, agjentët, këshilltarët ose siguresit e marrësit dhe i cili duhet të dijë informacionin konfidencial në lidhje me këto Rregulla të Alokimit;
 - (c) për aq sa kërkohet për të qenë në përputhje me legjislacionin e BE-së (të tilla si Rregullorja (BE) nr. 1227/2011 dhe Rregullorja (BE) nr. 543/2013) ose aktet e zbatueshme ligjore të Komunitetit të Energjisë dhe/ose legjislacioni kombëtar i zbatueshëm ose ndonjë akt tjetër përkatës administrativ i brendshëm siç janë kodet e rrjetit;
 - (d) për aq sa kërkohet nga një gjykatë, arbitër ose gjykatë administrative ose një ekspert gjatë procedurave përpara tyre, në të cilin marrësi është Palë;
 - (e) siç mund të kërkohet nga Operatorët përkatës të Sistemit të Transmisionit për përmbushjen e detyrimit të tyre dhe detyrimeve të tyre në përputhje me ligjet në fuqi dhe këto Rregulla të Alokimit nga vetë ata ose përmes agjentëve ose këshilltarëve; ose
 - (f) për aq sa kërkohet për të marrë leje ose pëlqime nga një autoritet kompetent.

5. Për më tepër, detyrimet që rrjedhin nga ky nen nuk zbatohen:
- (a) nëse Pala që merr informacionin mund të dëshmojë se në kohën e shpalosjes, informacioni i tillë ishte tashmë i disponueshëm publikisht;
 - (b) nëse Pala marrëse siguron prova që, që nga koha e shpalosjes, informacioni në fjalë është marrë në mënyrë ligjore nga një palë e tretë ose është bërë i disponueshëm për publikun;
 - (c) për informacionin konfidencial të komunikuar, në përputhje me dispozitat ligjore dhe rregullatore, në një formë të inkorporuar nga e cila nuk mund të nxirret asnjë pjesë informacioni specifik për një pjesëmarrës në treg;
 - (d) për informacionin, publikimi i të cilit parashikohet shprehimisht nga këto Rregulla të Alokimit.
6. Detyrimet e konfidencialitetit në këtë nen mbeten të vlefshme për një periudhë prej pesë (5) vjetësh pas ndërprerjes së Marrëveshjes së Pjesëmarrjes të Pjesëmarrësit të Regjistruar.
7. Nënshkrimi i një Marrëveshjeje të Pjesëmarrjes dhe shkëmbimi i informacionit konfidencial nuk japin asnjë të drejtë për patentat, njohuritë ose ndonjë formë tjetër të pronës intelektuale në lidhje me informacionin ose mjetet e vëna në dispozicion ose të dërguara nga një Palë tek tjetra sipas kushteve të këtyre Rregullave të Alokimit.

Neni 60

Caktimi dhe nënkontraktimi

1. Platforma e Alokimit mund t'ia caktojë, përtërijë ose ndryshe transferojë ndonjë nga të drejtat ose detyrimet e saj sipas një Marrëveshjeje të Pjesëmarrjes ose këtyre Rregullave të Alokimit një Platforme tjetër të Alokimit. Platforma e Alokimit njofton Pjesëmarrësit e Regjistruar për ndryshimin duke dërguar një mjet elektronik siç specifikohet nga Platforma e Alokimit në faqen e saj të internetit me konfirmimin e pranimet sa më shpejt që është e mundur dhe në çdo rast të paktën dhjetë (10) ditë pune para datës në të cilën ndryshimi hyn në fuqi.
2. Një Pjesëmarrës i Regjistruar nuk mund të caktojë, përtërijë ose ndryshe transferojë ndonjë nga të drejtat ose detyrimet e tij sipas Marrëveshjes së tij të Pjesëmarrjes ose këtyre Rregullave të Alokimit pa miratimin paraprak me shkrim të Platformës së Alokimit.
3. Asgjë në këtë nen nuk e ndalon një Platformë Alokimi ose Pjesëmarrës të Regjistruar të hyjë në një marrëveshje nënkontraktimi në lidhje me këto Rregulla të Alokimit. Hyrja në një marrëveshje nënkontraktimi nga një Pjesëmarrës i Regjistruar nuk e liron Pjesëmarrësin e Regjistruar nga asnjë detyrim ose përgjegjësi sipas Marrëveshjes së tij të Pjesëmarrjes ose këtyre Rregullave të Alokimit.

Neni 61

Ligji rregullues

Këto Rregulla të Alokimit rregullohen dhe interpretohen në të gjitha aspektet në përputhje me ligjin belg.

Neni 62

Gjuha

Gjuha e zbatueshme për këto Rregulla të Alokimit do të jetë anglishtja. Për shmangien e dyshimit,

kur Operatorët e Sistemit të Transmisionit duhet t'i përkthejnë këto Rregulla të Alokimit në gjuhën e tyre kombëtare, në rast të mospërputhjeve ndërmjet versionit anglisht të publikuar nga Platforma e Alokimit dhe çdo versioni në një gjuhë tjetër, do të mbizotërojë versioni anglisht i publikuar nga Platforma e Alokimit.

Neni 63

Prona intelektuale

Asnjë Palë nuk fiton asnjë të drejtë, titull, licencë ose interes në ose për ndonjë të drejtë të pronës intelektuale të Palës tjetër në lidhje me këto Rregulla të Alokimit.

Neni 64

Marrëdhënia e palëve

1. Marrëdhënia e Platformës së Alokimit dhe Pjesëmarrësit të Regjistruar është ajo e ofruesit të shërbimit përkatësisht e përdoruesit të shërbimit. Përveç siç parashikohet shprehimisht në këto Rregulla të Alokimit, asgjë që përfshihet ose nënkuptohet në këto Rregulla të Alokimit nuk përbën ose konsiderohet se përbën Platformën e Alokimit ose një Pjesëmarrës të Regjistruar, partnerin, agjentin ose përfaqësuesin ligjor të tjetrit për çfarëdo qëllimi çfarëdo qoftë ai ose krijon ose konsiderohet se krijon ndonjë partneritet, agjenci ose besim midis Palëve.
2. Pjesëmarrësi i Regjistruar pranon që as Platforma e Alokimit, as ndonjë person që vepron në emër ose të lidhur me Platformën e Alokimit nuk bën asnjë përfaqësim, jep ndonjë këshillë ose jep ndonjë garanci ose marrje përsipër të çfarëdo lloji në lidhje me këto Rregulla të Alokimit, Marrëveshjet e Pjesëmarrjes ose informacionin e shpalosur ose ndryshe në raport me ose në lidhje me këto Rregulla të Alokimit, Marrëveshjet e Pjesëmarrjes dhe informacionin e shpalosur ose ndonjë transaksion ose rregullim të parashikuar nga këto Rregulla të Alokimit, Marrëveshjet e Pjesëmarrjes dhe Informacioni i shpalosur, përveç siç parashikohet në mënyrë specifike në këto Rregulla të Alokimit ose Marrëveshjen e Pjesëmarrjes.

Neni 65

Asnjë e drejtë e palës së tretë

Platforma e Alokimit dhe çdo Pjesëmarrës i Regjistruar pranojnë dhe bien dakord që një person që nuk është palë në Marrëveshjen e Pjesëmarrjes ndërmjet tyre, duke përfshirë çdo pjesëmarrës tjetër të tregut, nuk ka të drejtë të zbatojë këto Rregulla të Alokimit ose Marrëveshjen e Pjesëmarrjes ndërmjet Platformës së Alokimit dhe atij Pjesëmarrësi të Regjistruar.

Neni 66

Heqja dorë

1. Asnjë dështim për të ushtruar ose vonesë në ushtrimin e ndonjë të drejte, kompetence ose mjeti juridik të parashikuar me ligj ose në bazë të këtyre Rregullave të Alokimit nuk dëmton ose përbën heqje dorë nga një e drejtë e tillë ose e drejtë, kompetencë ose mjet juridik tjetër. Asnjë ushtrim i vetëm ose i pjesshëm i ndonjë të drejte, kompetence ose mjeti juridik të tillë nuk përjashton ose dëmton ndonjë ushtrim tjetër ose të mëtejshëm të saj ose ushtrimin e ndonjë të drejte, kompetence ose mjeti juridik tjetër të parashikuar me ligj ose sipas këtyre Rregullave të Alokimit.
2. Çdo heqje dorë nga ndonjë e drejtë, kompetencë ose mjet juridik sipas këtyre Rregullave të Alokimit duhet të jetë me shkrim dhe mund të jepet në varësi të kushteve që mendohet se

janë të përshtatshme nga dhënësi. Përveç nëse theksohet ndryshe shprehimisht, çdo heqje dorë është efektive vetëm në rastin dhe vetëm për qëllimin për të cilin është dhënë.

Neni 67

Marrëveshje e plotë

Këto Rregulla të Alokimit dhe Marrëveshja e Pjesëmarrjes përmbajnë ose i referohen shprehimisht të tërë marrëveshjes midis Platformës së Alokimit dhe secilit Pjesëmarrës të Regjistruar në lidhje me lëndën e saj dhe përjashtojnë shprehimisht çdo garanci, kusht ose marrje përsipër tjetër të nënkuptuar në ligj ose sipas zakonit dhe zëvendëson të gjitha marrëveshjet dhe mirëkuptimet e mëhershme ndërmjet Platformës së Alokimit dhe secilit Pjesëmarrës të Regjistruar në lidhje me to. Platforma e Alokimit dhe secili Pjesëmarrës i Regjistruar pranojnë dhe konfirmojnë se asnjëri prej tyre nuk miratojnë këto Rregulla të Alokimit ose Marrëveshjen e Pjesëmarrjes në mbështetje të ndonjë përfaqësimi, garancie ose marrjeje përsipër tjetër (përveç rasteve kur bëhet me mashtrim) që nuk pasqyrohet plotësisht në kushtet e këtyre Rregullave të Alokimit ose Marrëveshjen e Pjesëmarrjes.

Neni 68

Mjetet ekskluzive juridike

Të drejtat dhe mjetet juridike të parashikuara nga këto Rregulla të Alokimit dhe Marrëveshja e Pjesëmarrjes për Platformën e Alokimit dhe secilin Pjesëmarrës të Regjistruar janë ekskluzive dhe jo kumulative dhe, për aq sa lejohet me ligj, përjashtojnë dhe zëvendësojnë të gjitha të drejtat substantive (por jo procedurale) ose mjetet juridike të shprehura ose të nënkuptuara dhe të parashikuara me ligj ose statut në lidhje me lëndën e këtyre Rregullave të Alokimit dhe Marrëveshjes së Pjesëmarrjes. Prandaj, Platforma e Alokimit dhe secili Pjesëmarrës i Regjistruar heq dorë në masën më të plotë të mundshme nga të gjitha të drejtat dhe mjetet juridike të tilla të parashikuara me ligj ose statut dhe liron njëri-tjetrin prej tyre nëse i detyrohet ndonjërit prej tyre, zyrtarëve, punonjësve dhe agjentëve të vet në të njëjtën masë nga të gjitha detyrat, detyrimet, përgjegjësitë ose obligimet e parashikuara me ligj ose statut në lidhje me çështjet e trajtuara në këto Rregulla të Alokimit dhe Marrëveshjen e Pjesëmarrjes dhe merr përsipër të mos zbatojë ndonjë nga të njëjtat përveç siç parashikohet shprehimisht këtu.

Neni 69

Vlefshmëria e Pjesshme

Nëse ndonjë dispozitë e këtyre Rregullave të Alokimit ose një Marrëveshjeje të Pjesëmarrjes deklarohet e pavlefshme, e pazbatueshme ose e paligjshme nga gjykatat e cilitdo juridiksion të cilit i nënshtrohet ose në bazë të arbitrazhit ose me urdhër të ndonjë autoriteti kompetent, pavlefshmëria e tillë, pazbatueshmëria ose paligjshmëria nuk cenon ose ndikon në dispozitat e mbetura të këtyre Rregullave të Alokimit dhe Marrëveshjes së Pjesëmarrjes, të cilat vazhdojnë me fuqi dhe efekt të plotë, pavarësisht nga pavlefshmëria, pazbatueshmëria ose paligjshmëria e tillë. Çdo pjesë ose dispozitë(a) jovalide, e paligjshme, e pavlefshme dhe/ose e pazbatueshme zëvendësohet me pjesë ose dispozita të vlefshme, të ligjshme dhe/ose të zbatueshme në mënyrë që të arrihet efekti i synuar ekonomik dhe ligjor.

Shtojca 1

Lista e kufijve të Zonës Ofertuese për të cilat zbatohen Rregullat e Alokimit

Lista e kufijve të Zonës Ofertuese	
Lista e OST-ve përgjegjës	
Kroacia (HR) HOPS	<> Bosnja e Hercegovina (BiH) NOS BIH
Bosnja e Hercegovina (BiH) NOS BIH	<> Mali i Zi (ME) CGES
Mali i Zi (ME) CGES	<> Shqipëria (AL) OST
Shqipëria (AL) OST	<> Greqia (GR) IPTO
Greqia (GR) IPTO	<> Turqia (TR) TEIAS
Greqia (GR) IPTO	<> Maqedonia e Veriut (MK) MEPSO
Kosova (XK) KOSTT	<> Shqipëria (AL) OST
Kosova (XK) KOSTT	<> Mali i Zi (ME) CGES
Kosova (XK) KOSTT	<> Maqedonia e Veriut (MK) MEPSO

Kjo Listë e kufijve të Zonës Ofertuese për të cilët zbatohen Rregullat e Alokimit mund të ndryshohet ose plotësohet në përputhje me dispozitat e nenit 52 (Kohëzgjatja dhe ndryshimi i Rregullave të Alokimit) të këtyre Rregullave të Alokimit.

Shtojca 2

Lista e kufijve të Zonës Ofertuese ku Kodi i Regjistrimit ACER i caktuar nga Agjencia Evropiane për Bashkëpunimin e Rregullatorëve të Energjisë (ACER) është parakusht për pjesëmarrje në procesin e alokimit.

Lista e kufijve të Zonës Ofertues	
Kroacia (HR) HOPS	<> Bosnja dhe Hercegovina (BiH) NOS BiH